

四庫全書

史部

欽定四庫全書

續後漢書卷五

元 郝經 撰

列傳第二

宗室諸劉

義例曰寵故諸侯王自馬以降皆漢室之胄為
收伯而不終者也陳壽以劉虞為魏諸侯虞以
死拒山東之議而為公孫瓚所害何事於魏哉
又以馬璋為蜀二牧與先主共為蜀書皆私意
也馬璋亦漢賊爾豈得並與復漢室之帝乎錄
表漢之牧伯錄為孫策并滅表子琮降操則自
漢臣也而以錄為吳之僭偽表為魏之僭偽皆
非也故皆以為宗室而繫之漢云若劉煜劉放

雖亦帝室之胄乃佐操丕父子篡漢而終臣於魏故以為魏臣絕不為親也

陳王寵

劉焉

子璋任安

董扶王商

劉虞

劉繇

子基允岱

劉表

子琦劉先

琮傅異

蒯越王雋

韓嵩

陳王寵明帝子敬王羨之後也羨始封廣平徙封西平

帝崩遺詔封陳食淮陽郡薨子思王鈞嗣薨子懷王竦

嗣薨無子立敬王子安壽亭侯崇是為頃王薨子孝王

承嗣薨寵嗣熹平二年國相師遷追奏前相魏愔與寵共

祭天神希幸非冀罪至不道有司奏遣使者案驗是時

新誅勅海王惺靈帝不忍復加法詔檻車傳送惺遷詣

北寺詔獄使中常侍王酺

原注華嶠漢書及宦者傳諸本並作甫此云酺未知孰是

酺音蒲

與尚書令侍御史雜考惺辭與王共祭黃帝老君

求長生福而已無他冀幸酺等奏惺職在匡正而所為

不端遷誣告其王罔以不道皆誅死有詔赦寵寵善弩

射十發十中中皆同處

原注華嶠漢書寵射其祕法以天覆地載參連為奇又有三微

三小三微為經三小為緯經緯相將萬勝之方然要在機牙

中平中黃巾賊起郡縣

皆棄城走寵有彊弩數千張出軍都亭治兵自守國人

畏之不敢離叛國相會稽駱俊素有威恩時天下飢荒陳獨完富鄰郡人多歸之俊傾廩振贍皆得全活有衆十餘萬獻帝初義兵起寵率衆屯陽夏自稱輔漢大將軍後袁術求糧於陳而俊拒之術忿恚遣客詐殺俊及

寵陳由是破敗

原注謝承漢書俊字孝達烏傷人察孝廉補尚書侍郎擢拜陳國相人有產子

厚致米肉達府主意生男女者以駱為名袁術使部曲將張闓陽私行到陳之俊所俊往往從飲酒因詐殺俊一

郡吏人哀號如喪父母

是時諸國無復租祿而數見虜奪并日而

食轉死溝壑者甚衆夫人姬妾多為丹陵兵烏桓所略

及曹丕篡代自封國已除滅者其餘光武子趙孝王良

後博陵王珪

謹案後漢書趙孝王良光武叔父此冠以光武子與東海恭王強等並列疑誤

東

海恭王強後汶陽侯羨沛獻王輔後恭王曜子契東平

憲王蒼後頃王端子凱任城孝王尚後新昌侯子佗明

帝子彭城靖王恭後孝王和孫祗梁節王暢後敬王元子彌

章帝子河間孝王開後濟南王康子某

原注後漢書稱開不應與祖同諱故闕疑

曰某云

謹案後漢書濟南王康子贊贊為黃

巾賊所害子開嗣此以開為濟南王子疑誤

皆降封崇德侯頗

食租賦而重禁錮不得遷徙仕宦晉泰始初始除漢宗室禁制

謹案目錄此下有劉焉劉虞傳今闕又陳王寵

劉焉當有議今亦闕

劉繇字正禮東萊牟平人也齊孝王少子封牟平侯子

孫家焉

原注史記年表孝王齊悼惠王肥子將閭也

繇祖父本博學號稱通

儒舉賢良方正為般長卒父興一名方有雋才終山陽

太守伯父寵以經明行修舉孝廉察四行累遷會稽太

守有惠政徵為將作大匠山陰父老六七十人相率送寵

人齋百錢去縣數十里於若耶山谷間遮寵曰自明府

下車狗不夜吠吏稀到門年老遭值聖化今聞當去故
戮力來送寵謝之選受一大錢故號一錢太守八居九
列四登三事以太尉辭位卒于家繇年十九從父黽為
賊所劫質繇篡取以歸由是顯名舉孝廉為郎中除下
邑長時郡守以貴戚託之遂棄官去州辟部濟南濟南
相中常侍子貪穢不法謹案陳志作貪穢不
循通志循下有法字繇奏免之
平原陶丘洪薦繇欲令舉茂才刺史曰前年舉公山奈
何復舉正禮乎洪曰若明使君用公山於前擢正禮於

後所謂御二龍於長塗騁騏驎於千里不亦可乎會辟
司空掾除侍御史不就避亂淮浦詔書以為揚州刺史
時袁術在淮南繇畏憚不敢之州欲南渡江吳景孫賁
迎置曲阿術圖偕逆攻沒諸郡縣繇遣樊能張英屯江
邊拒之以景賁術所授用迫逐使去於是術自置揚州
刺史與景賁并力攻英能等歲餘不下詔加繇為牧振
武將軍衆數萬人

謹案今志作衆萬餘人宋本及通志皆作衆數萬人與此合

孫策

東渡破英能等繇使太史慈拒策慈為策所禽繇悉衆

與策戰大敗策遂入曲阿盡虜繇妻子部曲繇走丹徒
將奔會稽許子將曰會稽富貴策之所貪且僻在海隅
不可往也不如豫章北連豫壤西接荊州若收合吏民
遣使者貢獻與曹兗州相聞雖袁公路為間其人豺狼
不能久也足下受王命且帝室之胄

謹案志注
無此五字

孟德景

升必相救濟繇從之遂沂江南保豫章駐彭澤使笮

原注
杜力

反融先往助豫章太守朱皓討袁術所用

謹案志注
劉表所用

太守諸葛玄許子將謂繇曰笮融出軍不顧名義者也

謹案志注作不顧命名義者也冊府無今字與此合

朱文明善推誠以信人宜使

密防之融到果詐殺皓代領郡事繇進討融為融所破更復招合屬縣攻破融融敗走入山為民所殺繇尋病卒時年四十二後孫策西伐江夏還過豫章收載繇喪善遇其家王朗遺策書曰劉正禮昔初臨州未能自達實賴尊門為之先後用能濟江成治有所處定踐境之禮感分結意情在終始後以袁氏之嫌稍更乖刺更以同盟還為讎敵原其本心實非所樂康寧之後常願渝

平更成復踐宿好一爾分離款意不昭奄然殂隕可為
傷恨知敦以厲薄德以報怨收骨育孤哀亡愍存捐既
徃之猜保六尺之託誠深恩重分美名厚實也昔魯人
雖有齊怨不廢喪紀春秋善之謂之得禮誠良史之所
宜籍鄉校之歎聞正禮元子致有志操想必有以殊異
威盛刑行施之以恩不亦優哉繇長子基字敬輿年十
四居繇喪盡禮故吏餽餉皆無所受基遭多難潛處味
道與羣弟居常夜卧早起妻妾稀見其面諸弟敬憚事

之猶父不妄交游門無雜賓孫權愛敬之權為驃騎將軍辟東曹掾拜輔義校尉建忠中郎將權為吳王遷大農權嘗宴飲騎都尉虞翻醉酒犯忤權欲殺之威怒甚盛基犯顏諫爭翻以得免方大暑權宴飲船樓上雷雨大作權以蓋自覆又命覆基餘不覆也其見待如此徙郎中令權稱尊號改光祿勳分平尚書事年四十九卒後權為子霸納基女賜第一區四時寵賜與全張比基二弟鑠尚皆騎都尉繇兄岱字公山歷位侍中董卓以

為兗州刺史與袁紹同起兵討卓青州黃巾大入州界
岱欲擊之濟北相鮑信諫不聽與戰果為賊所殺

議曰漢祚剥裂天枝蠹敝遺胄遐孤耽沈耽

原注音委

音被

莫

能自振劉虞獨能飭身厲行忠厚共儉化行幽朔夙夜
憂勤志存王室至使董卓畏服羣雄見推却尊號而不
受奉章表以自通振振哉漢家賢宗子衛武公東平憲

王之儔也

原注國語武公年九十五矣猶歲成於國恭
恪于朝作抑詩自儆至沒身謂之獻聖後

漢書東平憲王蒼光武之子也好經書雅有智思顯宗
甚愛重之手詔國中傳曰日者問東平王處家何等最

樂王言為善最樂其
言甚大副是要腹矣

不幸而為公孫瓚所襲惜哉宋范

曄曰若虞瓚無間糾人完聚稽保燕薊之饒繕兵昭武
以臨羣雄之隙舍諸天運徵乎人文則古之休烈何遠
之有嗚呼天不祐漢盜憎主人其能無間乎又弱一个
馬劉氏危矣劉繇當治平之世足為賢方伯素無禦亂
應變之才惡能拒袁術之僭嬰孫策之鋒哉折敗以死
於是宗室諸劉盡矣本根無所庇蔭天子獨守虛器操
遂弒后醜子除封國重禁錮使無噍類然後攘取乃不

能殺照烈而漢統歸之終自為僭偽豈非天哉鮮于輔
為虞復讎迎和附紹縱吏義烈威瓚于死盡臣子之義
矣

劉表字景升山陽高平人魯恭王餘之後也身長八尺
餘姿貌溫偉年十七受學於同郡王暢暢為南陽太守
過於儉嗇表進諫曰奢不僭上儉不逼下蓋中庸之道
是故蘧伯玉耻獨為君子府君若不師孔聖之明訓而
慕夷齊之末操無乃皎然自遺於世暢答曰以約失之

者鮮且吾以矯世也由是知名與同郡張隱薛郁王訪

宣靖公褚恭劉祇田林為友俱被訛議號為八顧又與

汝南陳翔范滂魯國孔昱勃海苑康山陽檀敷張儉南

陽岑暉為八及

原注後漢書及者言其能導人追宗者也三君八俊錄陳翔字子鱗汝南郡

陵人官至御史中丞海內貴珍陳子鱗范滂字孟博汝南細陽人為太尉掾海內譽諤范孟博孔昱字世元終於洛陽令海內才珍孔世元苑康字仲真勃海重合人官至泰山太守海內彬彬苑仲真檀敷字文友山陽瑕丘人為蒙令海內通士檀文友張儉字元節山陽高平人官至衛尉海內忠烈張元節岑暉字公孝南陽棘陽人為太尉掾海內珍好岑公
孝其稱表海內所稱劉景升詔書捕案黨人表亡走得

免黨禁解辟大將軍何進掾為北軍中候初平元年長沙

太守孫堅殺荊州刺史王廙

原注王氏譜廙字通曜
晉太保祥之伯父也

詔

書以表為荊州刺史時江南宗賊太盛

原注宗黨
共為賊

又袁

術屯魯陽盡有南陽之衆吳人蘓代領長沙太守貝羽

為華容長各阻兵為亂表乃單馬入宜城請南郡名士

蒯良蒯越襄陽蔡瑁與共謀畫表謂越曰宗賊雖盛而

衆不附若袁術因之禍必至矣吾欲徵兵恐不能集其策

安出良曰衆不附者仁不足也附而不治者義不足也

苟仁義之道行百姓歸之如水之趨下何患所至之不
從而問兵興與策乎顧問越越曰治平者先仁義治亂
者先權謀兵不在多在得人也袁術勇而無斷蘓代貝
羽匹夫之勇不足慮也宗賊率多貪暴為下所患越有
所素養者使示之以利必持衆來使君誅其無道

謹案陳志

無使字後漢書有使字與此合

施其才用威德既行襁負而至矣兵集

衆附南據江陵北守襄陽荊州八郡

原注漢官儀荊州管長沙零陵桂陽

南陽江陵武陵南郡章陵

可傳檄而定公路雖至無能為也表曰子

柔之言雍季之論也異度之計舅犯之謀也

原注呂氏春秋時晉

文公將與楚人戰于城濮召舅犯而問楚來我寡奈何
而可舅犯對曰臣聞繁禮之君不足於文繁戰之君不
足於詐君亦詐之而已文公以舅犯言告雍季雍季曰
竭澤而漁豈不得魚而明年無魚焚藪而田豈不得獸
而明年無獸詐偽之道雖今偷可後將無復非長術也
文公用舅犯之言而敗楚人於城濮反而為賞雍季在
上左右諫曰城濮之功舅犯之謀也君用其言而後其
身或者不可乎文公曰雍季之言百代之利也舅犯之
言一時之務也馬有以一遂使越遣人誘宗賊帥至者
時之務先百代之利乎

十五人

謹案陳志作五十五人後漢書作十五人此從漢書

皆斬之而襲取其衆

惟江夏賊張虎陳生擁兵據襄陽城表使越與龐季往

譬之乃降江南悉平諸守令聞表威名多解印綬去表
遂理兵襄陽以觀時變表術與其從兄紹有隙而紹與
表相結故術與孫堅合從襲表表敗堅遂圍襄陽會表
將黃祖救至堅為流矢所中死餘衆退走及李傕等入
長安表遣使奉貢催欲連表為援乃以表為鎮南將軍
荊州牧封成武侯假節建安元年天子將還雒陽表遣
兵助修宮室軍資委輸千里不絕及遷都許表遣使貢
獻復北結表紹治中鄧義諫表不聽荅義曰內不失職

貢外不背盟主天下之達義也治中獨何怪乎義乃辭
疾而退終表之世不仕驃騎將軍張濟自關中走南陽
因攻穰城中飛矢死荊州官屬皆賀表曰濟以窮來主
人無禮至於交鋒此非牧意牧受弔不受賀也使人納
其衆衆聞之喜遂皆服從三年長沙太守南陽張羨性
屈彊表不禮焉郡人桓階說羨舉長沙零陵桂陽三郡
叛表附曹操表遣兵攻之連年不下羨病死長沙復立
其子懌表攻破懌盡平三郡

原注英雄記張羨南陽人
先作零陵桂陽守甚得江

湘間心然性屈彊不順表薄其為人不甚禮也美因懷恨遂叛表

於是開土益廣南接

五嶺

原注裴氏廣州記大庾始安臨賀桂陽揭陽是謂之五嶺鄧德明南康記大庾一也桂陽甲騎二也

九真都龐三也臨賀萌渚四也始安越城五也北據漢川地數千里帶甲十餘

萬初荊州人好亂加四方駭震寇賊相扇處處糜沸表

招誘有方威懷兼洽其姦猾宿賊更為效用萬里肅清

咸悅而服之關西兗豫學士歸者蓋千數表安慰賑贍

皆得資全遂起立學校博求儒術綦母闓宋忠等撰立

五經章句謂之後定愛民養士從容自保久之見漢祚

陵夷遂不共職貢郊祀天地居處服用僭擬乘輿馬及
曹操與袁紹相持於官渡紹遣人求助表許之不至亦
不援曹操且欲觀天下之變從事中郎南陽韓嵩別駕
劉先說表曰今豪傑並爭兩雄相持天下之重在於將
軍若欲有為起乘其敝可也如其不然固將擇所宜從
豈可擁甲十萬坐觀成敗求援而不能助見賢而不能
歸此兩怨必集於將軍恐不得中立矣曹操善用兵且
賢俊多歸之其勢必舉袁紹然後移兵以向江漢恐將

軍不能禦也今之勝計莫若舉荊州以附曹操操必重德將軍長享福祚垂之後嗣此萬全之策也蒯越亦勸之表狐疑不斷乃遣嵩詣操觀望虛實謂嵩曰今天下未知所定而曹操擁天子都許昌為我觀其釁嵩對曰聖達節次守節嵩守節者也今策名委質惟將軍所命雖赴湯蹈火死無辭也以嵩觀之曹公之明必得志於天下將軍若欲歸之使嵩可也如其猶豫嵩至京師天子假嵩一職不獲辭命則成天子之臣將軍之故吏爾

在君為君不復為將軍死也惟加重思表以為憚使彊
之至許果拜嵩侍中零陵太守及還盛稱曹操威德勸
遣子入侍表大怒以為懷貳陳兵詬嵩將斬之嵩不為
動容徐陳臨行之言表妻蔡氏諫曰韓嵩楚國之望也
且其言直誅之無辭表猶怒乃考殺從行者知無他意
但囚嵩而已表貌儒雅而中疑忌皆此類也六年昭烈
去表紹來荊州表厚相待結而不能也十一年冬曹
操征烏桓昭烈說表襲許表不從

原注漢晉春秋曰太
祖之始征柳城劉備

說表使襲許表不從及太祖還謂備曰不用君言故失此大會也備曰今天下分裂日尋干戈事會之來豈有終極乎若能應之於後者則此未足為恨也

十三年曹操自將征表未至八月表疽發背卒表在荊州幾二十年家無餘積二子琦琮表初以琦貌類己甚愛之後為琮娶其後妻蔡氏之姪蔡氏遂愛琮而惡琦毀譽之言日聞於表又妻弟蔡瑁及外甥張允並得幸於表而睦於琮琦不自寧嘗與琅邪諸葛亮謀自安之術亮初不對後將亮游觀後園飲宴因共升高樓令去梯謂亮曰今日上不至天下不

至地言出子口而入吾耳可以言未亮曰君不見申生

在內而危重耳居外而安乎

原注左氏傳晉獻公嬖驪姬使太子申生居曲沃夷

吾居屈重耳居蒲及驪姬譖殺申生重耳出奔狄在外十九年而得晉國是為文公琦意感悟陰

規出計會表將江夏太守黃祖為孫權所殺琦遂求代

其任及表病甚琦歸省疾琦素慈孝允等恐其見表而

父子相感更有託後意乃謂琦曰將軍命君撫臨江夏

其任甚重今釋衆擅來必見譴怒傷親之歡重增其疾

非孝敬之道也遂遏於戶外使不得見琦流涕而去衆

聞而傷焉遂以琮嗣琮以侯印授琦琦怒投之地將因奔喪作難會曹操軍至新野琦走江南蒯越及東曹掾傅吳等說琮迎操降琮曰今與諸君據全楚之地守先君之業以觀天下何為不可乎吳對曰逆順有大體彊弱有定勢以人臣而拒人主逆也以新造之楚而禦國家其勢弗當也以劉備而敵曹操又弗當也三者皆短欲以抗王兵之鋒必亡之道也將軍自料何與劉備琮曰吾不若也吳曰誠以劉備不足禦曹操乎則雖保楚

地不足以自存也誠以劉備足以禦曹操乎則備不為

將軍下也願將軍勿疑

原注按獻帝建安十三年八月
蒯越等說劉琮降范書陳志表

傳皆云韓嵩亦說琮降
嵩時被囚必不預謀

操軍至襄陽琮舉州降昭烈走

夏口琮將王威說琮曰曹操既得將軍降劉備已走必

懈弛無備若給威兵數千徼之於險出其不意操可禽

也禽操則威震四海坐而虎步中夏雖廣可傳檄而定非

徒收一勝之功保今日而已此難遇之幾不可失也琮

不聽操以琮為青州刺史封列侯

原注魏武故事載令
曰琮有江漢山川之

險後服先殭與秦爭衡荊州則其故地劉鎮南久用其
民失身沒之後諸子鼎峙雖終難全猶可引日青州利
史琮心志高潔智慮深廣輕榮重義薄利厚德茂萬里
之業忽三軍之衆篤中正之體敦令名之譽上耀先君
之遺塵下圖不朽之餘祚鮑永之棄并州竇融之離五
郡未足以喻也雖封列侯一州之位猶恨此寵未副其
人而比有賤求還州監史雖尊秩祿未優今聽所執表
琮為諫議大夫敕同軍事後漢書蒯越等侯者十五
人乃釋嵩之囚以其名重甚加禮待使條品州人優劣
皆擢而用之以嵩為大鴻臚以交友禮待之蒯越光祿
勳劉先尚書令初表之結表紹也待中從事鄧義諫不
聽義以疾退終表世不仕操以為侍中其餘多至大官
操後敗於赤壁昭烈表琦為荊州刺史明年卒建安初
荊州童謡曰八九年間始欲衰至十三年無子遺自中

興以來荊州獨全及表為牧民又豐樂至建安八年九年表妻死諸將亦皆淪謝十三年表卒因喪破滅皆如其數比表卒華容有女子忽啼呼云荊州將有大喪言語過差縣以為妖言繫獄月餘忽於獄中哭曰劉荊州今日死華容去州數百里即遣馬吏驗視而表果死縣乃出之續又歌吟曰不意李立為貴人無幾操平荊州以涿郡李立為荊州刺史蒯越蒯通之後也深中足智儀狀魁傑大將軍何進聞其名辟為東曹掾越勸進誅

諸閭官進猶豫不決越知進必敗求出為南陽令佐劉表平定境內詔拜章陵太守封樊亭侯曹操入荊州表為光祿勳與荀彧書曰不喜得荊州喜得蒯異度爾建安十九年臨終與操書託以門戶操書報曰死者反生生者不愧孤少所舉行之多矣魂而有靈亦將聞孤此言也韓嵩字德高義陽人少好學貧不改操知世將亂不應三公辟命與同好數人隱居於鄴西山中黃巾起嵩避難南方劉表逼為別駕轉從事中郎表郊祀天地

嵩諫不從漸見違忤及自許還囚之曹操入荊州釋嵩囚待以交友之禮使條品州人優劣皆擢用之拜大鴻臚卒劉先字始宗博學彊記尤好黃老言明習漢家典故為劉表別駕奉章詣許見曹操時賓客並會操問先劉牧如何郊祀天地先對曰劉牧託漢室肺腑處牧伯之位而遭王道未平羣凶塞路抱玉帛而無所聘覲修章表而不獲達御是以郊天祀地昭告赤誠操曰羣凶為誰先曰舉目皆是操曰今孤有熊羆之士步騎十萬奉

辭伐罪誰敢不服先曰漢道陵遲羣生憔悴既無忠義之士翼戴天子綏寧海內使萬邦歸德而阻兵安忍曰莫已若即蚩尤智伯復見於今也操嘿然拜先武陵太守操入荊州以先為漢尚書尋以為魏國尚書令卒傳與字公悌瓌偉博達有知人鑑辟公府拜尚書郎後客荊州以說劉琮之功賜爵關內侯曹丕時為侍中太和中年與在荊州目龐統為半英雄證裴潛終以清行顯統後輔昭烈見待次於諸葛亮潛位至尚書令並有名

德及在魏朝魏諷以才智聞巽謂之必反卒如其言
巽弟子嘏別有傳王儁字子文汝南人少為范滂許
章所識與南陽岑暉善曹操為布衣特愛儁儁亦稱
操有治世之具及袁紹與弟術喪母歸葬汝南儁與
操會之會者三萬餘人操密語儁曰天下將亂為亂
魁者必此二人也欲濟天下為百姓請命不先誅此
二子亂今作矣儁曰如卿之言濟天下者舍卿復誰
相對而笑儁為人外靜而內明不應州郡三府之命

公車徵不至避地武陵歸僞者百餘家天子都許徵
為尚書又不就劉表見紹強陰與紹通僞謂表曰曹
操天下之雄也必能興霸業繼桓文之功今乃釋近就
遠如有一朝之急遙望漠北之救不亦難乎表不從
卒于武陵年六十四操入荊州自臨江迎喪改葬于
江陵

議曰表據荆楚襟帶江漢瞰臨許雒向從昭烈之言勤
王威操則漢未遽亡也亦優游自喜陰蓄異志乃謂劉

焉在蜀如子夏之在西河曾不知已之題旌夏奠玉帛

有甚於焉其坐談西伯亦猶隗囂之在隴也

原注左氏傳宋公享

晉侯于楚丘請以桑林舞師題以旌夏晉侯懼而退入于房去旌卒享而還杜預注曰桑林殷天子樂名旌夏

大旌也玉帛郊裸玉爵也後漢書隗囂於己昭烈託自飾常以為西伯復作乃與諸將議自立為王

足無所表幾不容琮琦之亂不取哭墓而去當陽長阪之急棄妻子而不忍棄荊州之民嗚呼仁哉

贊曰焉利本顛墮剝維城璋尤庸闇遷奪猶輕驅除庸蜀赫我王靈懿哉幽州乃心帝室奔命奉章隕身碎璧

氣躔箕尾天津尚赤

原注 幽州尾箕之次析木之津

繇亦宗英材匪戡

難乃啟孫氏三辰肇判遂俾昭烈卒莫完漢表有全楚
坐收天命事會弗衷得死為幸

欽定四庫全書

續後漢書卷六

元 郝經 撰

列傳第三

漢臣

義例曰漢室之禍始於黃巾中於董卓終於曹操歷靈獻二帝而後天下三分當時將相大臣與一時僭偽或終於漢或終於魏或終於吳皆故漢臣也故自皇甫嵩至徐庶乃亡漢臣僚自諸葛亮至郤正乃恢復臣僚總為漢臣云

皇甫嵩 朱雋 蓋勲

謹案此卷傳文全闕惟存郝經議一篇其贊語

亦闕

議曰嗚呼國之將亡必有以兆亂發於意慮之所不及
東都之季所以為亂本者母后也外戚也宦官也大臣
也及其始禍乃在一妖賊張角同日關起至數十百萬

橫潰天下雖嵩雋仗鉞獮雞

原注上一時
鮮下替

一時豪傑怙亂植

兵為背脅疽根而不可去卒之孫氏曹氏據有天下十
之八使昭烈奔走一隅竟不能完漢蓋綱紀者國之元

氣也母后外戚宦官大臣更蠹迭壞國病已成一旦潰而為羣盜聚而為大盜債而不復藥有國君人者可不戒哉可不慎哉嵩雋有大將之畧昧匡時之幾遂為桀逆所制不能以功名終勲西州義士烈望高出一時奮辭抗議為卓所憚不能靖難銜憤而死棟折榱崩自是而漢亡矣

欽定四庫全書

續後漢書卷七

元 郝經 撰

列傳第四

漢臣

何進 弟苗

鄭泰

何顥

种劭

王允

王宏
士孫瑞

趙戩

謹案何進鄭泰何顥三傳闕

种劭字申甫拂之子也祖嵩延熹初為司徒大著名節

父拂初平元年代荀璘為司空李儼郭汜陷長安百官多避兵拂揮劍而出曰為國大臣不能止戈除暴致使凶賊兵刃向宮去欲何之遂戰而死劭早知名中平末為諫議大夫大將軍何進誅宦官召并州牧董卓至澠池而進意更狐疑遣劭宣詔止之卓不受遂前至河南劭迎勞之因譬令還軍卓疑有變使其軍士以兵脅劭劭怒稱詔大呼呵之軍士皆披遂前斥責卓卓辭屈乃還軍夕陽亭及進敗獻帝即位拜劭侍中卓既擅權而

惡劬彊力遂左轉議郎出為益涼二州刺史會父拂戰死竟不之職服終徵為少府大鴻臚皆辭不受曰昔我先人以身徇國吾為臣子不能除殘復怨何面目覲明主哉遂與馬騰韓遂及左中郎劉範諫議大夫馬宇共攻催汜以報其仇戰於長平觀下軍敗死之

議曰戚官並為亂本耦傷漢室久矣一旦相更屠并必兩斃而後已理勢然也故竇武何進倚母后恃元舅握兵柄操大權總攬豪傑登庸名士欲冀除閹穢卒之身

死而族滅以亂除亂神明不與也進復懷諫違衆卒召
外寇疣潰身殫遂淪鼎命悲夫鄭泰之止進召卓不用
而去可謂見幾而作也及與何顥發山東之謀祇為亂
階亦猶進之召卓也顥卒以憂死泰可謂幸而免矣國
之將亡殆如膏肓之疾動之死地雖雷扁和秦原注雷
公扁鵲
越人莫能善其術也种劬父子死國烈烈凜凜為不
死矣

謹案目錄王允傳附王宏士孫瑞趙戩今止存

趙戩一篇其王允王宏士孫瑞傳文俱闕

趙戩字叔茂長陵人性質正多謀初平中為尚書典選
舉董卓數欲有所私授戩輒拒不聽言色殫厲卓怒將
殺之衆為悚慄而戩自若卓悔謝釋之既收葬允三輔
大亂客於荊州劉表厚禮焉及曹操平荊州辟為掾後
為五官將司馬相國鍾繇長史年六十餘卒初昭烈襲
蜀戩曰劉備其不濟乎拙於用兵每戰則敗奔亡不暇
何以圖人蜀雖小區險固四塞獨守之國難卒并也徵

士傳幹曰劉備寬仁有度能得人死力諸葛亮達治知變正而有謀而為之相關羽張飛勇而有義皆萬人之敵而為之將此三人者皆人傑也以備之畧三傑佐之

何為不濟卒如幹言

原注范曄論曰士雖以正立亦以謀濟若王允之推董卓而分其權

伺其間而敝其罪當此之時天下懸解矣而終不以猜忤為之釁者知其本於忠義之誠也故推卓不為失正分權不為苟冒伺間不為狙詐及其謀濟意從則歸成於正也

議曰嘗觀燕將之射虎逡巡辟易怒則鞭馬而去視其便利以矢殪之王允之圖卓射虎之術也方其咆哮肉

人不置則縱令足厭一旦置之机上若割羊豕然宮闈不駭而清大慙可與語權矣故議者謂推卓不為失正

分權不為苟冒伺間不為狙詐然昧夫秦定包荒之義

原注秦九二曰包荒遂成屯難大貞之凶

原注屯九五曰大貞凶

使催汜犯

順臍火未冷又生數十百卓身死而不能衛君向之權

盡為今之迂矣士孫歸功不侯有勞謙之吉

原注謙九三勞謙君

子有終吉保身之智卒為亂兵所殺崑山之烈玉石俱焚吁

可畏哉

贊曰進本屠割馮藉椒掖智小謀大身夷族赤自我致
冠死有餘責公業諸賢匡時濟難龍蛇闢起漫為興嘆
奪命脫死亟走解散允篤智計漢火復然臍炷未滅頸
刃遽連明哲保身士孫獨賢終亦不免衆果勝天

欽定四庫全書

續後漢書卷八

元 郝經 撰

列傳第五

漢臣

董卓

李傕 樊稠

郭汜 張濟

楊奉 李樂

韓暹 胡才

韓遂

馬騰 閻行

成公英

張楊

董承

呂布

張邈 高順

邈弟 趙 陳珪

陳宮

謹案董卓傳闕

韓遂字文約與同郡邊章俱著名西州章為督軍從事

遣遂奉計詣京師大將軍何進聞其名請與相見遂說
進誅諸閹人進不從乃求歸及北宮伯玉等反劫章遂
為謀主遂因殺伯玉及章與馬騰合馬騰者字壽成右

扶風茂陵人伏波將軍援之後也其父

謹案後漢書注
父平蜀志注字

碩嘗為天水蘭干尉後失官因留隴西與羌錯居娶羌

女生騰騰少貧嘗從鄣山斫材木負販自給騰身長八

尺餘軀幹洪壯面鼻雄異而性仁厚人多敬愛之涼州

募民有勇力者

謹案陳志馬超傳注王國等及
氏羌叛州郡募民有勇力者

騰應募

耿鄙見而異之署為行軍事典領部曲討賊有功遷軍
司馬拜偏將軍及與遂合勇常冠軍遂騰之敗於長平
觀而走涼州也遂還金城騰屯汧隴間時西州少穀騰
表言軍人乏食求就穀池陽遂移屯長平岸頭池陽將
王承等恐騰為害乃攻騰營騰適出無備遂破走西上
會三輔亂不復東與韓遂結為異姓兄弟甚相親厚後
以部曲相侵入更為讎敵騰攻遂遂走合眾還攻騰殺
騰妻子連兵不釋下隴戰關中建安七年曹操欲圖呂

布恐袁紹侵擾關中西亂羌胡乃使司隸校尉鍾繇涼州牧韋端和解之繇移書遂騰為陳禍福遂騰各釋兵遣子入侍乃拜騰征南將軍並開府袁尚遣高幹郭援將兵數萬與匈奴單于寇河東遣使連和遂騰騰陰許之繇乃使傅幹說騰曰古人有言順道者昌逆德者亡曹公奉天子誅暴亂法明國治上下用命有義必賞無義必罰可謂順道者矣袁氏背王命驅胡寇以陵中國寬而能忌仁而無斷兵雖強實失天下心可謂逆德矣

今將軍既事有道不盡其力陰懷兩端欲以坐觀成敗
事定奉辭責罪將軍為誅首矣於是騰懼幹曰智者轉
禍為福今曹氏與袁氏相持而高幹郭援獨制河東曹
公雖有萬全之計不能禁河東之不危也將軍誠能引
兵討援內外擊之其勢必舉是將軍一舉斷袁氏之臂
解一方之急曹公必重德將軍將軍功名竹帛不能盡
載也惟將軍審所擇騰曰敬從教於是遣子超將精兵
萬餘人與繇會擊援大破之操乃徵騰入屯槐里轉拜

前將軍假節封槐里侯北備胡寇東備白騎騰進賢待
士矜救民命撫存瘡痍三輔安之曹操將伐荊州復使
張既說騰令釋部曲入宿衛騰許之已而更猶豫既恐
其為變乃移諸縣促儲待二千石郊迎騰不得已發東操
表騰為衛尉以超為偏將軍領騰營又拜超弟休為奉
車都尉休弟鐵騎都尉徙其家屬皆詣鄴惟超獨留十
六年曹操遣夏侯淵會鍾繇討張魯關中諸將疑為襲
已超與韓遂等十部皆反東扼潼關據有關中曹操親

征以譎計間超遂使相弑因擊遂等大破之操軍還誅
騰夷三族超復與遂破隴上諸郡超敗奔漢中復出遂
復與之圍祁山超復敗走夏侯淵追遂至於畧陽攻燒
長離羌屯遂救長離淵邀擊大破之遂以餘衆遯歸金
城建安二十年曹操征張魯至河池西平金城諸將麴
演蔣石等共斬遂送首于操遂自靈帝末始亂積三十
二年至是乃死年七十餘矣初隴西人宋建在枹罕自
稱河首平漢王置百官亦三十餘年曹操遣夏侯淵擊

建斬之涼州悉平成公英者金城人中平末隨韓遂謀
議軍事建安中遂自華陰破走還湟中部黨散去惟英
獨從其壻閭行欲殺遂以降夜攻遂不克遂歎曰丈夫
困厄禍起婚姻乎謂英曰今親戚離叛人衆轉少當從
羌中西南詣蜀爾英曰舉事數十年今雖罷敗何有自
棄巢窟而依人乎遂曰吾年老矣子欲何施英曰曹公
不能遠來獨夏侯爾夏侯之衆不足以追我又不能久
留且息肩於羌中以須其去招呼故人綏會羌胡猶可

有為也遂從其言時衆尚數千人遂宿有恩於羌胡羌
胡衛護之及夏侯淵還使閻行留後乃合羌胡數萬將
攻行行欲走會遂死英降操操見之甚喜以為軍師封
列侯從行出獵有三鹿過前操令射之三發皆中應弦
而斃操抵掌笑曰但韓文約可為盡節而孤獨不可乎
英下馬跪曰不欺明公假使英主人在實不來也遂流
涕哽噎操嘉其忠益親敬之魏黃初河西復亂遣英佐
涼州平隴右病卒閻行者金城人後名艷字彥明少有

健名為韓遂裨將建安初遂與馬騰相攻擊騰子超亦
以勇稱行嘗刺超矛折因以折矛撾超幾殺之十四年
遂使詣曹操操厚遇之表拜捷為大守行因請令其父
入宿衛西還見遂達操旨云謝文約卿始起兵時自有
所逼我所具明也今當共匡輔國朝行因謂遂曰將軍
興軍以來三十餘年民兵疲瘁所處又狹宜早有所附
是以前在鄴自啓當今老父詣京師誠謂將軍亦宜遣
一子以示丹赤遂曰且可復觀望數歲後遂遣其子與

行父母俱東會遂西討張猛留行守舊營而馬超等反
舉遂為都督及遂還超謂遂曰前鍾司隸任超使取將
軍關東人不可復信也今超棄父以將軍為父將軍亦
當棄子以超為子行諫遂不欲令與超合遂謂行曰今
諸將不謀而同似有天數乃東詣華陰及曹操與遂交
馬語行在其後操謂行曰當念作孝子及超等破走行
隨遂還金城操聞行前意故但誅遂子孫在京師者手
書與行曰觀文約所為使人笑來吾前後與書無所不

說如此何可復忍卿父諫議自平安也雖然牢獄之中
非養親之處且又官家亦不能久為人養老也遂聞行
父獨在欲使并遇害乃強以少女妻行行不獲已納之
操果殺行會遂使行別領西平郡乃勒其部曲攻遂不
勝將家人東奔操操表封列侯

謹案目錄此下有張楊傳今闕止存附傳董承
一篇

董承靈帝母永樂太后之姪獻帝之舅也既召曹操遷

帝於許以承為車騎將軍開府自都許之後權歸曹氏
天子總已百官備員而已帝不勝操專偏置密詔衣帶
中付承令與昭烈結天下義士共誅操未發操遣昭烈
東征袁術承更與偏將軍王服謀曰郭多有數百兵壞
李催數萬人顧足下與吾同否昔呂不韋之門須子楚
而後高今吾與子猶是也

原注史記秦子楚為質於趙
呂不韋說曰吾能大子之門

子楚笑曰且自大君之門而乃大吾門呂不韋曰子不
知也吾門待子門而大不韋入秦說華陽夫人立子楚
是為莊襄王以不韋為丞相始
皇立遣不韋於蜀飲鴆而死

服惶懼不敢當且曰兵

少耳承曰舉事訖得操成兵顧豈少耶今長水校尉种
輯議郎吳碩吾腹心辦事者遂與服及輯碩決計事覺
承等皆為操所誅夷三族

謹案目錄此下有呂布傳今闕

議曰卓為羿莽而姦計不足其暴戾淫虐過之是以遽
起而遽滅適足以貽禍而資羣盜遂使亮孽蠱蜚刺天
肆獠賈怒鵠奪豨呀劫質天子囚戮公卿折并頓擲盪
耗漢家神靈漸熄銷沒而後各就誅夷自昔國亡驅除

之際未有若斯之亂且酷也韓遂馬騰跳踉河右全起

始亂聚散不常梗踣關輔三十餘年軼勝廣矣

原注漢書陳勝

字涉陽城人吳廣字叔陽夏人也二世元年發閭左戍漁陽勝廣皆為屯長行至斬大澤鄉與其徒屬殺將尉

袒右稱大楚勝自立為將軍廣為都尉入據陳勝乃立為王廣為假王


張揚有奉迎之功

據河山之郡而無雄才卒墮匹夫之手智不足稱也董承無何進之力又無王允之術幾事不密反為操所圖遂使昭烈去而不復王室無所依賴操乃窮亮極狠仇怨天子蜚血禁籙躡背宮闈怒而不置詩曰無拳無勇

職為亂階承之謂矣呂布翻覆虓猛而不知義至於禽
戮乞解縛自效豈天也哉昭烈當屯難之際屈身於布
以貴下賤及其禽布健決誅之奮其乾剛盡龍德飛潛
之義矣

贊曰召戎起釁運極厄會稔塞風饕虎躍鯨沛逆鈇淬
日克鋒掃宇翻覆宗社廢立君主血蟻咸京金盈郿塢
巖巖公師烈烈尚父雖伏天誅竟委皇綱臬捩蠭團紛
紜冠場乾坤榛蕪王猷允亡楊雖有功承實不智遂敢

首禍布弗知義共為妖孽穢我神器



欽定四庫全書

史部

續後漢書卷

九至
十三

詳校官編修臣黃壽齡

編修臣裴謙覆勘

膳錄貢生臣吳壽康

膳錄監生臣楊以灃

膳錄監生臣南光祇

膳錄監生臣溫廷鑑

欽定四庫全書

續後漢書卷九

元 郝經 撰

列傳第六

漢臣

袁紹

字譚 審配

從兄遺

外甥高幹

逢紀

袁術

袁紹上

袁紹字本初汝南汝陽人自司徒安四世居三公位由

是執傾天下紹司徒湯之孫司空逢之庶孽也出後伯

父五官中郎將成

原注後漢書安字邵公祖父良習蓋氏易安傳良學舉孝廉除陰平長永

平十三年楚王英謀逆下郡覆考三府舉安能理劇拜
楚郡太守治楚獄所仲理者四百餘家敝為河南尹連
太僕元初三年拜司空章和元年代桓虞為司徒時天
子幼弱外戚擅權每朝會進見及與公卿言國家事未
嘗不噫鳴流涕自天子及大臣皆倚賴之四年薨子敞
字叔平和帝元初三年代劉愷為司空安孫湯字仲河
桓帝初為司空累遷司徒太尉湯次子逢字周陽靈帝
時為司空逢弟隗字次陽獻帝初為太傅為董卓所害
魏書自安以下皆博愛容衆無所揀擇賓客入其門無
賢愚皆得所欲為天下所歸紹即逢之庶子將異母兄
也出後成為子英雄記成字文開壯健有部分貴戚
權豪自大將軍梁冀以下皆與結好言無不從故京師
為作諺曰事少為郎弱冠除濮陽長早喪其父及遭母
不諧問文開

喪去官三年喪畢追感幼孤再服父服凡廬墓六年紹
壯健有威容既累世台輔豪傑歸仰加傾心折節莫不
爭赴其庭士無貴賤與之抗禮輜輶柴轂填接街陌自
大將軍梁冀以下莫不善之與張邈何顓伍瓊為奔走
友曹操傾慕亦內交焉於是聲望甚盛及徙居雒陽不
妄通賓客養名自重非海內知名不得相見睥睨權倖

不應辟命

原注英雄記紹隱居雒陽不妄通賓客非海內知名不得相見又好游俠與張孟卓何伯

求吳子卿許子遠伍德瑜皆為奔走之友不應辟命裴松之曰案魏書云紹逢之庶子出後伯父如此記所言

則似實成所生夫人追服所生禮無其文
況於所後而可以行之二書未詳孰是

宦官皆惡之

中常侍趙忠言於省中曰袁本初坐作聲價不應呼召
好養死士不知此兒欲何所為乎紹叔父太傅隗聞之
責數紹曰汝不改行而與時偕且破我家始辟大將軍
何進掾為侍御史遷虎賁中郎將中平五年初置西園
八校尉以紹為中軍校尉
原注後漢書作佐軍校尉靈帝崩少帝即
位紹使客張津說何進曰黃門常侍秉權日久又永樂
太后與諸常侍專通財利將軍宜整頓天下為海內除

患進以為然遂與紹謀誅閹官及蹇碩令趙忠圖進事
覺誅碩紹說進曰碩既伏誅不盡滅其黨必為後患今
大行在前殿將軍以詔書領兵衛守可勿入宮進納其
言後更狐疑紹脅進曰今釁構已成形勢已露將軍不
早決之事留變生後機禍至復為竇氏矣進乃白太后
太后不從乃召董卓欲以脅太后常侍黃門聞之皆詣
進謝惟所錯置紹勸進便可於此決之至再三進不許
轉紹司隸校尉假節專命擊斷紹使雒陽方畧武吏檢

司諸宦者又令紹從弟虎賁中郎將術選溫厚虎賁二百人入禁中代持兵黃門陞守門戶中常侍段珪等矯太后命召進入殺之宮中亂術將虎賁燒南宮嘉德殿青瑣門欲迫出珪等珪等不出劫帝及陳留王走小平津紹既斬宦者所署司隸校尉許相又捕趙忠等斬之

原注山陽公載記紹與王匡等并力入端門遂於承明堂上格殺中常侍高望等二人

乃閉北宮

門勒兵捕諸閹宦無少長皆殺之急迫珪等悉赴河死帝得還宮董卓將兵至騎都尉泰山鮑信說紹曰董卓

擁制疆兵累拒詔命今乘亂而入將有異志若不早圖
必為所制其新至罷勞襲之可禽也紹畏卓不敢發頃
之卓議欲廢立謂紹曰天下之主宜得賢明每念靈帝
令人憤毒董卓似可今欲立之為能勝史侯否人有小
智大或癡亦知復何如為當且爾紹曰漢家君天下四
百許年恩澤深渥兆民戴之今上富於春秋未有失德
聞於天下公欲廢嫡立庶恐眾不從公議也卓按劍叱
紹曰豎子敢然天下事宜不在我我欲為之誰敢不從

紹詭對曰此國家大事請出與太傅議卓復曰劉氏種不足復遺紹勃然曰天下健者豈惟董公橫刀長揖徑

出縣節於上東門而奔冀州

原注英雄記紹揖卓去坐中驚愕卓新至見紹大家

故不敢害

山陽公載記卓以袁紹棄節改第一條為赤菴

裴松之曰紹于時與卓未構嫌隙故卓與之諮

謀若但以言議不同便罵為豎子而有推刃之心及紹

復答崛強為甚卓又安能容忍而不加害乎且如紹此

言進非亮正退違詭避而顯其競爽之旨以觸時闕之

鋒有志功業者理豈然哉此語妄之甚矣時卓暴戾

氣凌一時決計廢立而紹忤之故致怨罵紹亦一世之

傑氣自蓋卓揖之而去亦其宜也是不為妄故今取之

卓既廢帝立陳留王購紹急侍中周珙

謹案陳志必作珙

城門校

尉伍瓊議郎何顥等為卓信待而陰為紹地說卓曰夫
廢立大事非常人所及紹不達大體恐懼故出奔非有
他志也今購之急勢必為變袁氏樹恩四世門生故吏
徧於天下若收豪傑以聚徒眾英雄因之而起則山東非
公有也不如赦之拜一郡守紹喜於免罪必無患矣卓
以為然乃拜紹渤海太守封郎原注回浪反鄉侯紹猶稱兼
司隸初平元年紹遂以渤海起兵與後將軍術冀州牧
韓馥豫州刺史孔伋兖州刺史劉岱陳留太守張邈廣

陵太守張超河內太守王匡山陽太守袁遺東郡太守

橋瑁

原注英雄記瑁字元偉玄族子先為兖州刺史甚有威惠

濟北相

案原本訛北海相據後漢書改

鮑信等十郡守相同時俱起衆各數萬以討董卓為名

紹與王匡屯河內佃屯潁川馥屯鄴邈岱瑁遺咸屯酸

棗共約盟誓推紹為盟主紹自號車騎將軍領司隸校

尉卓聞紹起兵乃誅其叔父太傅隗及太僕基使司隸

宣璠收袁氏宗族在京師者尺口以上皆殺之

原注卓別傳悉

埋青城外東都門內而加書焉又

既有盜取者復以屍送郡藏之既而卓脅遷車駕西

幸長安卓留據雒陽焚傷宮室發掘陵寢獨長沙太守
孫堅與卓戰屢破之紹等皆畏卓莫敢先進諸軍十餘
萬列營酸棗日置酒高會曹操為陳計策不從引兵與
卓將徐榮戰不利詣揚州募兵紹還屯河內諸軍食盡
衆散卓遣少府陰循等譬喻諸將使罷兵紹等各執其
使殺之是時豪傑多附紹且感其家禍人思為報州郡
蠱起莫不以袁氏為名韓馥見豪傑歸心於紹忌其得
衆恐將圖已遣從事守紹門不聽發兵橋瑁乃詐作三

公移書傳驛州郡說董卓罪惡天子危逼企望義兵以
釋國難馥方聽紹舉兵而謀於衆曰助袁氏乎助董氏
乎治中劉惠勃然曰興兵為國安問袁董冀州於他州
不為弱也兵者凶事不可為首今宜視他有發初者然
後和之未晚也劉岱遺馥書曰董卓無道天下所共攻死
在旦暮但卓死之後當回師討文節爾擁彊兵阿凶逆
寧可得置馥大懼歸咎於惠將殺之從事耿武排閤伏
惠上願并見斬得不死作徒被赭衣掃除劉岱與橋瑁

相惡岱殺瑁以王肱領東郡太守自是山東州郡互相
吞滅不復謀討卓矣初青州刺史焦和亦起兵討卓與
諸將西行不為民人保障甫濟河黃巾已入其境青州
素殷實甲兵甚盛和每望寇奔北未嘗接風塵交旗鼓
也性好卜筮信鬼神入見其人清談干雲出觀其政賞
罰清亂州遂蕭條悉為丘墟和病卒紹使臧洪領青州
以撫之二年紹與山東諸將議立幽州牧劉虞為帝遣
使奉章詣虞虞拒不受張楊自上黨率衆數千歸紹紹

使與南單于於扶羅屯漳水韓馥意益深疑於紹陰貶
節其軍糧欲使其衆離散會馥將麴義叛馥與戰而敗
紹因與義相結紹客逢

原注
音麗

紀謂紹曰將軍舉大事而

仰人資給不據一州無以自全紹曰冀州兵彊吾士飢
乏設不能辦無所容立紀曰韓馥庸才可密要公孫瓚
使取冀州馥必駭懼因遣辯士為陳禍福迫於倉卒必
自遜讓可因據其位紹然之即以書與瓚瓚遂引兵而
至外託討董卓而陰謀襲馥馥與戰不利會董卓入關

紹還軍延津使外甥陳留高幹

原注謝承書幹字元才志宏邀文武秀出父

躬蜀郡太守祖賜司隸校尉

及馥所親潁川辛評荀諲郭國等說馥

曰公孫瓚將燕代之卒乘勝南來而諸郡應之其鋒不可當袁車騎引軍東向其意未可量也竊為將軍危之馥懼曰然則為之奈何諲曰君自料寬仁容衆為天下所附孰與袁氏馥曰不如也臨危吐決智勇過人又孰與袁氏馥曰不如也世布恩德天下家受其惠又孰與袁氏馥曰不如也諲曰袁氏一時之傑將軍資三不如

之執久處其上彼必不為將軍下也夫冀州天下之重
資也彼若與公孫瓚并力取之危亡可立而待也夫袁
氏將軍之舊且為同盟當今之計莫若舉冀州以讓袁
氏彼必厚德將軍瓚亦不能與之爭矣是將軍有讓賢
之名而身安於泰山也馥性恇怯因然其計長史耿武
別駕閔純治中李歷謹案後漢書作騎都尉沮授
此治中李歷從魏志也聞而
諫曰冀州帶甲百萬穀支十年袁紹孤客窮軍仰我鼻
息譬如嬰兒在股掌之上絕其哺乳立可餓殺奈何欲

以州與之馥曰吾袁氏故吏且才不如本初度德而讓
古人所貴諸君獨何病焉先是馥從事趙浮程奐將彊
弩萬張屯孟津聞之率兵馳還時紹在朝歌清水浮等
從後來船數百艘衆萬餘人整兵鼓夜過紹營紹甚惡
之浮等到謂馥曰袁本初軍無斗糧各已離散雖有張
揚於扶羅新附未肯為用不足敵也浮等請自以見兵
拒之旬日之間必土崩瓦解明將軍但當開閣高枕何
憂何懼馥又不聽乃避位出居中常侍趙忠故舍遣子

送印綬以讓紹紹將至從事十人爭棄馥去獨耿武閔
純杖刀拒之不能禁乃止紹皆殺之紹遂領冀州牧承
制以馥為奮威將軍使監護諸將寵遇甚厚而實無所
領御引廣平沮授為別駕因謂授曰今賊臣作亂朝廷
播遷吾歷世受寵志竭立命興復漢室然齊桓非夷吾
不能成霸句踐非范蠡無以存國今欲與君戮力同心
共安社稷將何以匡濟之乎授曰將軍弱冠登朝則播
名海內廢立之際則忠義奮發單騎出奔則董卓懷怖

濟河而北則渤海稽首振一郡之卒撮冀州之衆威震
河朔名重天下雖黃巾猾亂黑山跋扈舉衆東向則青
州可定還討黑山則張燕可滅回衆北首則公孫必擒
震脅戎狄則匈奴必從橫大河之北合四州之地收英
雄之才擁百萬之衆迎大駕於西京復宗廟于雒邑號
令天下誅討未服以此爭鋒誰能敵之比及數年其功

不難紹喜曰此吾心也即表授為監軍奮武將軍

原注
獻帝

傳授少有大志多權畧任州別駕舉茂才歷二縣令
又為韓馥別駕表拜騎都尉表紹得冀州又辟馬

魏

郡審配

原注先賢行狀配字正南少忠烈慷慨有不可犯之節紹領冀州委贖心之任

鉅鹿田

豐

原注先賢行狀豐字元皓鉅鹿人或云渤海人豐天姿瓌傑權畧多奇少喪親居喪盡哀日月雖過笑不

至矧博覽多識名重州黨初太尉府舉茂才遷侍御史閭官擅朝英賢被害豐乃棄官歸家袁紹起義卑辭厚幣以招致豐豐以王室多難志在匡救乃應紹命以為別駕並以正直不得志於馥

紹以豐為別駕配為治中及南陽許攸逢紀荀諲皆為

謀主

原注英雄記紀字元國初紹去董卓出奔與許攸及紀俱詣冀州紹以紀聰達有計策甚親信之與

共舉紹以河內朱漢為都官從事漢先為韓馥所不禮

且欲邀迎紹意擅發兵圍守馥第拔刀登屋馥走上樓

收得馥大兒槌折兩脚紹立收漢殺之馥猶愛怖從紹
索去往依張邈後紹遣使詣邈有所計議與邈耳語馥
在坐上謂為見圖無何起至溷以書刀自殺公孫瓚大
破青州黃巾於東光還屯廣宗威震河朔時州郡務相
兼并以自彊大紹與術亦相離貳術遣孫堅擊董卓未
返紹以周昂為豫州刺史襲取堅陽城堅還擊昂走之
術遣瓚弟越助堅攻昂越為流矢所中死瓚怒曰余弟
死禍起於紹也遂出軍屯檠河上疏數罪惡進兵攻紹

冀州諸城望風響應紹懼以所佩渤海太守印綬授瓚從弟範遣之郡而範遂去紹領渤海兵助瓚瓚乃自署其將帥為青冀兗三州刺史又悉改置郡縣守令紹乃

自出擊瓚陳於界橋南二十里瓚步兵三萬

謹案兵三萬與後漢

書合陳志英雄記俱作二萬

列為方陳騎萬疋分為左右兩翼白馬

義從為中堅亦分為兩校左射右射左旌旗鎧甲光照天地紹令麴義以精兵八百為先登彊弩千張夾承之紹自以步兵數萬結陳於後義久在涼州曉習羌鬪

兵皆精銳瓚輕其兵少縱騎騰之義兵皆伏楯下不動未至數十步同時俱起揚塵大叫直前衝突彊弩雷發瓚軍大奔臨陳斬瓚所置冀州刺史嚴綱獲甲首千餘級追至界橋瓚斂兵還戰義復破之遂到瓚營拔其牙

門

原注真人水鏡經凡軍始出立牙竿必令完堅若有折將軍不利牙門旗竿軍之精也即周禮司常職云

軍旅會同置旌門是也

餘衆皆走紹在後十數里見瓚已破不復

設備發鞍息馬帷帳下彊弩數十張大戟士百餘人瓚散兵二千餘騎卒至圍紹數重亂矢雨下田豐扶紹欲

卻入空垣紹以兜鍪撲地曰大丈夫當前鬪死而反逃
牆垣間邪促使彊弩競發多所殺傷瓚騎不知為紹頗
稍引卻會麴義來迎騎乃散去紹振旅還鄴三年瓚又
遣兵至龍湊挑戰紹復擊破之瓚遂還幽州不復出紹
乃與瓚所置青州刺史田楷連戰士卒疲頓遂以其子
譚為青州刺史楷與戰不勝四年天子使太傅馬日磾
太僕趙岐和解關東岐別詣河北紹出迎於百里上拜
奉朝命岐住紹營移書告瓚瓚遣使與紹書曰趙太僕

以周召之德銜命來征宣揚朝恩示以和睦曠若開雲
見日何喜如之昔賈復寇恂亦爭士卒欲相危害世祖

解紛乃俱陞見同與共出釁難既釋時人美之

原注後漢書賈

復部將殺入於潁川寇恂戮之於市復以為恥還過潁川曰見恂必手劍之恂出於道稱疾而還帝乃微恂恂至引見時復先在坐欲起相避帝曰天下未定兩虎安得私鬪今日朕分之於是並坐極謹遂共車同出結友而去
而自省邊鄙得與將軍共同斯好此誠將軍之恥而璣

之幸也紹乃領兵南還三月上巳大會賓從於薄落津

修禊事以為樂

原注韓詩章句鄭俗三月上巳於溱洧兩水之上秉蘭祓除不祥風俗通周禮

女巫掌歲時祓除疾病禳者絜也於水上盟絜也已者
祉也邪疾已去祈介祉也歷法三月建辰己卯退除可
以拂除
災也 聞魏郡兵反與黑山賊于毒共覆鄴城殺太守

栗成賊十餘部衆數萬人會于鄴中坐客皆憂怖失色

紹自若也

原注獻帝春秋紹勸督引
滿投並言笑容貌自若

賊陶升者故內黃

小吏獨將部衆踰城西入閉守州門不納他賊載紹家

及諸衣冠身自扞衛送至斥丘紹到遂屯斥丘以升為

建議中郎將乃引軍入朝歌鹿場山蒼巖谷討于毒圍

攻五日破之斬毒及長安所置冀州牧壺壽遂尋山北

行薄擊諸賊左髭文八等皆斬之又擊劉石青牛角黃
龍左校郭大賢李大目于羝根等皆屠其屯壁遂與黑
山賊張燕及四營屠各鴈門烏桓戰于常山燕精兵數
萬騎數千匹紹與連戰十餘日燕兵死傷雖多而紹軍
亦疲憊遂俱退麴義自恃有功驕縱不軌紹殺之而并
其衆初帝之立非紹意故欲立劉虞帝在長安竟不通
問興平二年李傕等以紹雄據河朔威名日盛乃拜紹
為右將軍其冬車駕東還為李傕所追於曹陽沮授說

紹曰將軍累葉輔弼世濟忠義今朝廷播越宗廟毀壞
觀諸州郡外託義兵內圖相滅未有勤王卹民者今州
城麤定兵彊士附西迎大駕即宮鄴都挾天子以令諸
侯畜士馬以討不庭誰能禦之紹悅將從之潁川郭圖
原注九州春秋圖字公則淳于瓊曰漢室陵遲為日久矣今欲興之
不亦難乎且英雄並起各據州郡連徒聚眾動有萬計
所謂秦失其鹿先得者王今迎天子自近動輒表聞從
之則權輕違之則拒命非計之善者授曰今迎朝廷至

義也於事會大計也若不早圖必有先之者矣夫權不失幾功不厭速將軍其圖之紹竟不從以圖等言為然

原注陳志初天子之立非紹意及在河東紹遣潁川郭圖使馬國還說紹迎天子都鄴紹不從裴松之曰案獻帝傳沮授畫迎帝都鄴策而國沮之此稱郭國之計與傳違也曹操圍張超於雍丘東

郡太守臧洪從紹請兵救超紹不與操拔雍丘殺超洪絕紹不與通紹興兵圍之城陷執洪殺之建安元年帝至雒陽曹操迎帝都許盡收河南地關中皆附詔書下紹責以地廣兵多而專自樹黨不聞勤王之師紹上書

曰臣聞昔有哀歎而霜隕悲哭而崩城者

原注淮南子
鄒衍事燕惠

王盡忠左右譖之仰天而哭夏五月天為降霜
說苑齊莊公攻莒為五乘之賓而杞梁獨不預歸而不食其
母曰食汝生而無義死而無名則雖非五乘孰不汝笑
生而有義死而有名則五乘之賓盡汝下也及與莒戰
梁遂關殺二十七人而死妻聞而哭城為之隤而隅為之崩

每讀其書謂為信然於

今況之乃知妄作何者臣出身為國破家立事至乃懷
忠獲釁抱信見疑晝夜長吟剖肝泣血曾無崩城隕霜
之應故鄒衍杞婦何能感徹臣以負薪之資拔於陪隸
之中奉職憲臺擢授戎校常侍張讓等滔亂天常侵奪

朝威賊害忠德扇動姦黨故大將軍何進忠國疾亂義
心赫怒以臣頗有一介之節可責以鷹犬之功故授臣
以督司諮臣以方畧臣不敢畏憚彊禦避禍求福與進
合圖事無違異忠策未盡而元帥受敗太后被質宮室
焚燒陛下聖德幼冲親遭危困時進既被害師徒喪沮
臣獨將家兵百餘人抽戈承明竦劒翼室虎叱羣司奮
擊凶醜曾不決辰罪人斯殄此誠愚臣效命之一驗也
會董卓乘虛所圖不軌臣父兄親從並當大位不憚一

室之禍苟惟寧國之義故遂解節出奔創謀河外時卓
方貪結外援招悅英豪故即臣渤海中以軍號則臣之
與卓未有纖芥之嫌若使苟欲滑泥揚波偷榮求利則
進可以享竊祿位退無門戶之患然臣愚所守志無傾
奪故遂引會英雄興師百萬飲馬益津軟血漳河會故
冀州牧韓馥懷挾逆謀欲專權執扼絕軍糧不得踵係
至使猾虜肆毒害及一門尊卑大小同日并戮鳥獸之
情猶知號呼臣所以蕩然忘哀貌無隱戚者誠以忠孝

之節道不兩立顧私懷已不能全功斯亦愚臣破家徇國之二驗也又黃巾十萬焚燒青兗黑山張楊蹈藉異域臣乃旋師奉辭伐畔金鼓未震狡敵知亡故韓馥懷懼謝咎歸土張楊黑山同時乞降臣輒承制竊比寶融以議郎曹操權領兗州牧會公孫瓚師旅南馳陸梁北境臣即星駕席卷與瓚交鋒假天之威每戰輒克臣備公族子弟生長京輦頗聞俎豆不習干戈加自始祖先臣以來世作輔弼咸以文德盡忠得免罪戾臣非與瓚

交戎馬之勢爭戰陳之功者也誠以賊臣不誅春秋所
貶苟云利國專之不疑故冒踐霜雪不憚劬勤實庶一
捷之福以立終身之功社稷未定臣誠恥之太僕趙岐
銜命來征宣陛下含宏之施蠲除細故與下更新奉詔
之日引師南轅是臣畏怖天威不敢怠慢之三驗也又
臣所上將校率皆清英宿德令名顯達登鋒履刃死者
過半勤恪之功不見書列而州郡牧守競盜聲名懷持
二端優游顧望皆列土錫圭跨州連郡是以遠近狐疑

議論紛錯者也臣聞守文之世德高者位尊倉卒之時
功多者賞厚陛下播越非所雒邑乏祀海內傷心志在
憤惋是以忠臣肝腦塗地肌膚橫分而無悔心者義之
所感故也今賞加無勞以携有德杜黜忠功以疑衆望
斯豈腹心之遠圖將乃讒慝之邪說使之然也臣爵祿
通侯位二千石殊恩厚德臣既叨之豈敢闕覲重禮以

希彤弓鉞矢之命哉

原注左氏傳王命尹氏策命晉侯為侯伯賜之大路之服彤弓一彤

矢百張弓十張矢千

誠傷偏裨列校勤不見紀盡忠為國翻成重

愆斯蒙恬所以悲號於邊獄白起歔歔於杜郵也

原注
史記

胡亥遣使者殺蒙恬恬不肯死使者即以屬吏繫於陽周恬謂然太息曰恬罪當死矣起臨兆屬之遼東城萬餘里此其中不能無絕地脈此乃恬之罪也遂吞藥自殺秦王免白起為士伍逮之陰審白起既行出咸陽

西門十里至杜郵秦王乃使使者賜之劍自裁

太傅日磬位為師保任配東征

而耗亂王命寵任非所凡所舉用皆衆所捐棄而容納其策以為謀主令臣骨肉兄弟還為讎敵交鋒接刃構難滋甚臣雖欲釋甲投戈事不得已誠恐陛下日月之明有所不照四聰之聽有所不聞乞下臣章咨之羣賢

使三槐九棘議臣罪戾

原注周官三槐三公位焉左九棘孤卿大夫位焉右九棘公侯

伯子男位焉鄭玄注曰槐之言懷也懷來人於此欲與謀也樹棘以為位者取其赤心而外刺象以赤心有刺

也若以臣今行權為釁則桓文當有誅絕之刑

原注齊桓晉文

皆以諸侯行天子事故云行權若以衆不討賊為賢則趙盾可無書弑

之貶矣

原注左氏傳趙穿攻靈公于桃園宣子未出亡而復太史書曰趙盾弑其君以示于朝宣子曰

不然對曰子為正卿亡不越竟反不討賊非子而誰

臣雖小人志守一介若使得

申明本心不愧先帝則伏首歐刀褰衣就獲臣之願也

惟陛下垂尸鳩之平

原注詩尸鳩在桑其子七兮淑人君子其儀一兮毛萇注曰尸鳩之

養其子旦從上下墓從下上平均
如一言善人君子執義亦如此

絕邪諂之論無令臣

結恨三泉於是以紹為太尉封鄴侯時曹操自為大將

軍紹恥為之下

原注漢制太尉位在大將軍上明帝以
永平王蒼為驃騎大將軍以王故位公

上和帝以舅竇憲征匈奴還遷大將
軍在公上自是大將軍位在太尉上表辭不受操懼讓

位於紹二年春袁術稱帝於壽春三月詔將作大匠孔

融持節拜紹大將軍錫弓矢節鉞虎賁百人兼督冀青

幽并四州然後受之紹每得詔書患有不便於己乃欲

移天子自近使說操以許下埤

原注
音婢

濕雒陽殘破宜徙

都鄆城以就全實操拒之田豐說紹曰徙都計既不克
從宜早圖許奉迎天子動託詔書號令海內此筭之上
者不爾終為人禽悔無益也紹不從會紹亡卒詣操云
田豐勸紹襲許操方圍張繡於穰引兵還密謀圖紹四
年春紹復擊公孫瓚圍瓚易京破之斬瓚遂并其衆拓
定幽土盡有河朔四州之地志驕氣盈貢御希簡主簿
耿包密白紹曰赤德衰盡袁為黃盾宜順天人稱尊號
原注獻帝春秋袁舜後黃應代赤故包有此言舜以土德王故黃漢火德故赤紹以包白事示

軍府僚屬皆言包妖妄宜誅紹不得已殺包以自解又以初平年號與本初字合必能克平禍亂於是簡精兵十萬騎萬匹以審配逢紀統軍事田豐荀諝許攸為謀

主顏良文醜為將帥欲以攻許

原注世語紹步卒五萬騎八千孫盛評曰案魏

武謂崔琰曰昨案賁州戶籍可得三十萬衆由此推之但冀州勝兵已如此況燕幽并及青州乎紹之大舉必悉師而起十沮授諫曰謹案志作沮近討公孫師出歷年

萬近之矣

授田豐同諫

百姓疲弊倉庫無積賦役方殷未可動也宜務農息民先遣使獻捷天子若不得通乃表曹操隔我王路然後

進屯黎陽漸營河南益作舟船繕修器械分遣精騎鈔其邊鄙令彼不得安我取其逸如此可坐定也郭圖審配曰兵法十圍五攻敵則能戰今以明公之神武連河朔之彊衆以伐曹操其勢易若覆手何必乃爾授曰救亂誅暴謂之義兵恃衆馮彊謂之驕兵義者無敵驕者先滅曹操奉迎天子建宮許都以令天下今舉師南向於義則違且廟勝之策不在彊弱曹操法令既行士卒精練非公孫瓚坐受圍者也今棄萬安之術而興無名

之師竊為公懼之圖配曰武王伐紂不為不義況兵加曹操而云無名且今師徒精勇將士思奮而不及時早定大業所謂天與不取反受其咎此越之所以霸吳之所以滅也監軍之計在於持牢而非見時知幾也紹納圖言圖等因是譖授曰授監統內外威震三軍若其浸盛何以制之夫臣與主同者亡此黃石之所忌也且御衆於外不宜知內紹乃分授所統為三都督使授及郭圖淳于瓊各典一軍騎都尉崔琰諫曰天子在許民望

助順不可攻也紹不從

袁紹下

五年昭烈殺徐州刺史車胄據沛以圖曹操操懼乃自將擊昭烈田豐說紹曰與公爭天下者曹操也操今東擊劉備兵連不可卒解舉軍而襲其後可一往而定兵以機動斯其時也紹辭以子疾未得行豐舉杖擊地曰嗟乎事去矣夫遭難遇之機而以嬰兒病失其會惜哉紹聞而怒之遂疏焉曹操畏紹渡河急擊昭烈破之昭烈奔

紹紹於是進軍攻許田豐以既失前機不宜便行諫紹
曰曹操既破劉備則許下非復空虛且操善用兵變化
無方衆雖少未可輕也今不如久持之將軍據山河之
固擁四州之衆外結英雄內修農戰然後簡其精銳分
為奇兵乘虛迭出以擾河南救右則擊其左救左則擊
其右使敵疲於奔命人不得安業我未勞而彼已困不
及三年可坐克也今釋廟勝之策而決成敗於一戰若
不如志悔無及也紹不從豐彊諫忤紹紹以為沮衆遂

械繫之紹乃宣檄州郡曰蓋聞明主圖危以制變忠臣慮
難以立權是以有非常之人然後有非常之事有非常
之事然後立非常之功夫非常者故非常人所擬也曩
者彊秦弱主趙高執柄專制朝權威福由已時人迫脅
莫敢正言終有望夷之禍祖宗焚滅汙辱至今永為世
鑒原注史記秦二世夢白虎齧其左驂馮殺之怪問占
夢卜曰涇水為祟二世乃齋望夷宮欲祠涇水使使
責讓趙高以盜事高懼乃陰與其及臻吕后季年產祿
壻咸陽令閻樂數二世二世自殺

專政內兼二軍外統梁趙擅斷萬機決事省禁下陵上替

海內寒心於是絳侯朱虛興兵奮怒誅夷逆暴尊立太宗故能王道興隆光明顯融此則大臣立權之明表也

司空曹操祖父中常侍騰與左悺徐璜並作妖孽饕餮

放橫傷化虐民父嵩乞弓攜養因賊假位與金輦壁輸

貨權門竊盜鼎司傾覆重器

原注騰嵩事並見曹操傳後漢書左悺河南人為

小黃門徐璜下邳人為中常侍

操贊閹遺醜本無懿德標狡鋒俠好亂

樂禍幕府董統鷹揚

原注漢書音義衛青征匈奴大克獲帝就拜大將軍於幕中因曰幕

府掃除凶逆續遇董卓侵官暴國於是提劍揮鼓發命

東下收羅英雄棄瑕取用故遂與操同諮合謀授以裨

師謂其鷹犬之才爪牙可任至乃愚佻短畧輕進易退

傷夷折衄數喪師徒幕府輒復分兵命銳脩完補輯表

行東郡領兗州刺史被以虎文獎躡威柄

原注文選注
法言曰羊質

而虎皮言操本羊質而被以虎文也李賢引續漢志云
虎賁將冠鵬冠虎文單衣文選注是也注又曰躡威也

言獎成其威柄也
陳志作賊非也

冀獲秦師一克之報

原注左氏傳晉
敗秦師于殽秦

伯伐晉濟河焚舟取王官及郅
晉人不出遂霸西戎用孟明也

而操遂承資跋扈肆行

凶忒

原注謝承後漢書操得兗
州東疆威內懷反紹意

割剝元元殘賢害能故

九江太守邊讓英才俊偉天下知名直言正色論不阿

諂身首被梟懸之誅妻孥受灰滅之咎

原注事見
讓本傳

自是

士林憤痛民怨彌重一夫奮臂舉州同聲故躬破於徐

方地奪於呂布彷徨東裔蹈據無所幕府惟彊幹弱枝

之義且不登叛人之黨

原注左氏傳圍宋彭城非宋地也於是為宋討魚石故稱宋且

不登叛人叛人呂布也

故復援旌擐甲席卷起征金鼓響振布衆

奔沮拯其死亡之患復其方伯之位

原注謝承後漢書
孫園呂布於濮陽

為布所破投紹紹哀之乃
給兵五千人還取兗州

則幕府無德於兗土之民而

有大造於操也後會鑾駕反旆羣虜冠笄時冀州方有

北鄙之警匪遑離局

原注禮記各司其局左氏傳離局姦也局部分也

故使從

事中郎徐勛就發遣操使繕修郊廟翊衛幼主操便放

志專行脅遷省禁卑侮王室

謹案陳志注作王宮誤

敗法亂紀坐

召三臺專制朝政

原注應劭漢官儀尚書為中臺御史為憲臺詔者為外臺召文選作領

爵賞由心刑戮在口所愛光五宗所惡滅三族

原注五宗高祖

及孫三族父族母族妻族也

羣談者受顯誅腹議者蒙隱戮百寮鉗

口道路以目尚書記朝會公卿充員品而已故太尉楊

彪典歷三司享國極位操因緣睚眦被以非罪榜楚參并五毒備至觸情任忒不顧憲章

原注事見彪本傳章文選作綱

又議

郎趙彥忠諫直言議有可納是以聖朝含聽政容加錫

原注文選作飾

操欲迷奪明時杜絕言路擅收立殺不俟報聞

又梁孝王先帝母昆墳陵尊顯桑梓松柏猶宜恭肅而操帥將吏士親臨發掘破梓裸屍掠取金寶至今聖朝

流涕士民傷懷操又特置發丘中郎將摸金校尉

謹案宋書

唐帝紀曰親武帝有發丘中郎摸金校尉

所過墮突無骸不露身處三公之位而

行桀虜之態汙國虐民毒施人鬼加其細政苛慘科防
互設罾繳充蹊坑穿塞路舉手挂網羅動足觸機陷是
以兗豫有無聊之民帝都有吁嗟之怨厯觀載籍無道
之臣貪殘酷烈於操為甚幕府方詰外姦未及整訓加
意含覆冀可彌縫而操豺狼野心潛包禍謀乃欲摧撓
棟梁孤弱漢室除滅忠正專為島雄往者伐鼓北征公
孫瓚彊禦桀逆拒圍一年操因其未破陰交書命外助
王師內相掩襲故引兵造河方舟北濟會其行人發露

瓚亦梟夷故使鋒芒挫縮厥圖不果爾乃大軍過蕩西

山屠各左校皆束手奉質爭為前登犬羊殘醜消淪山

谷於是操師震懼晨夜逋遯屯據教倉阻河為固

原注
獻帝

春秋操引軍造河託言助紹實圖襲鄴以為欲以塘螂

之斧禦隆車之隧

原注莊子遽伯玉謂顏闔曰汝不知夫塘螂乎怒臂以當車轍

幕府

奉漢威靈折衝宇宙長戟百萬胡騎千羣奮中黃育獲

之士

原注尸子中黃伯曰余左執大行之殺而右搏彫虎戰國策范雎說秦王曰烏獲之力焉而死夏

育之勇
馬而死

騁良弓勁弩之勢并州越大行

原注
高幹

青州涉濟

深

原注
表譚

大軍汎黃河而角其前荊州下宛葉而犄其後

原注
劉表

雷震虎步並集虜庭若舉炎火以炳飛蓬覆滄海

以沃漂炭有何不消滅者哉又操軍吏士其可戰者皆
自出幽冀或故營部曲或怨曠思歸流涕北顧其餘究
豫之民及呂布張楊之遺衆覆亡迫脅權時苟從各被
創夷人為讎敵若迴旆方徂登高岡而擊鼓吹揚素麾
以啟降路必土崩瓦解不俟血刃方今漢室陵遲網維
弛絕聖朝無一介之輔股肱無折衝之勢方畿之內簡

練之臣皆垂頭搨翼莫所憑恃雖有忠義之佐脅於暴虐之臣焉能展其節義又操持部曲精兵七百圍守宮闕外託宿衛內實拘執懼其篡逆之萌因斯而作此乃忠臣肝腦塗地之秋烈士立功之會也可不勗哉操又矯命稱制遣使發兵恐邊遠州郡過聽而給與強寇弱主違衆旅叛舉以喪名為天下笑則明哲不取也即日幽并青冀四州並進書到荊州使勒見兵與建忠將軍協同聲勢州郡各整戎馬羅落境界舉師揚威並匡社

稷則非常之功於是乎著其得操首者封五千戶侯賞錢五十萬部曲偏裨將校諸吏降者勿有所問廣宣恩信班揚符賞布告天下咸使知聖朝有拘逼之難

謹案此檄

文皆据文選故與後漢書三國志節錄者不同

紹進軍黎陽臨發沮授會其宗

族散貲財以與之曰夫勢在則威無不加勢亡則不保一身哀哉其弟宗曰曹操士馬不敵君無懼焉授曰以曹兗州之明畧挾天子以為資我雖兗伯珪衆實疲弊而將驕主汰軍之破敗在此行也揚雄有言六國蚩蚩

為羸弱姬其今之謂乎紹先遣顏良禦操將劉延於白馬授又諫紹曰良性促狹雖驍勇不可獨任紹不聽操救延與良戰斬良紹渡河壁延津南沮授臨船歎曰上盈其志下矜其功悠悠黃河吾其濟乎遂以疾退紹不許而意恨之復省其所部并屬郭圖紹使昭烈及文醜挑戰操又擊破之斬醜再戰而禽二將軍中大震操還軍官渡紹進保陽武沮授又說紹曰北軍雖衆而勁果不及南軍南軍穀少而資儲不如北軍南幸於急戰北

利於緩師宜徐持久曠以日月紹不從連營稍前逼官
渡遂合戰操軍不利復還堅壁紹為高櫓起土山射營
中矢下如雨營中蒙楯而行操乃為發石車擊紹樓皆
破紹軍呼為霹靂車紹為地道欲襲操操輒於內為長塹
以拒之又遣奇兵襲紹運車大破之盡焚其穀食相
持百餘日操軍糧盡疲困多叛應紹紹遣淳于瓊等將
兵萬餘人北迎糧運沮授說紹可遣蔣奇別為支軍於
表以絕操之鈔紹不從許攸曰曹操兵少而悉師拒我

許下餘守勢必空弱若分遣軍星行掩襲許拔則奉天子以討操操成禽矣如其未潰可令首尾奔命破之必也紹又不能用會攸家犯法審配收繫之攸遂奔操而說使襲取淳于瓊等瓊等時在烏巢去紹軍四十里操自將步騎五千人夜往攻之紹聞操擊瓊謂長子譚曰就操破瓊吾拔其營彼固無所歸矣乃使高覽張郃等攻操營郃曰曹操精兵往必破瓊等瓊等破則事去矣請先往救之郭圖固請攻操營郃曰曹操營固攻之必

不拔瓊等見禽吾屬盡為虜矣紹但遣輕騎救瓊而以重兵攻操營不能下操大破瓊等斬之盡燔其穀紹軍恟懼郭圖慙其計反譖張郃於紹曰郃快軍敗郃忿懼遂與高覽焚攻具詣操降於是紹軍大潰紹與譚等幅巾乘馬與八百騎渡河至黎陽北岸入其將軍蔣義渠營至帳下把其手曰孤以首領相付矣義渠避帳而處之使宣令馬衆聞紹在稍復集餘衆降操操盡阮之前後八萬人沮授為操軍所執乃大呼曰授不降也為所

執爾操見授謂曰分野殊異遂用圯絕不圖今日乃相得也授對曰冀州失策自取奔北授智力俱困宜其見禽操曰本初無謀不用君計今喪亂過紀國家未定方當與君圖之授曰叔父母弟縣命袁氏若蒙公靈速死為福操嘆曰孤早相得天下不足慮也遂赦而厚遇焉授尋謀歸紹乃誅之軍還或謂田豐曰君必見重矣豐曰公貌寬而內忌不亮吾忠而吾數以至言迂之若勝而喜必能赦我戰敗而恚內忌將發我必死矣紹軍士既

敗皆拊膺泣曰向令田豐在此必不至於敗也紹謂逢
紀曰冀州諸人聞吾軍敗皆當念吾惟田別駕前諫止
吾與衆不同吾亦慙見之紀曰豐聞將軍之退拊手大
笑喜其言之中也紹於是謂僚屬曰吾不用田豐言果
為所笑遂殺之初操聞豐不從戎喜曰紹必敗矣及紹
奔遼復曰向使紹用其別駕計尚未可知也

原注孫盛曰觀田豐

沮授之謀雖良平何以遇之故君貴審才臣尚量主君
用忠良則霸王之業隆臣奉闇后則覆亡之禍至存亡
榮辱常必由茲豐知紹必敗敗則已必死甘冒虎口以
盡忠規烈士之於所事慮不存已夫諸侯之臣義有去

就沉豐與紹非純臣乎詩云逝將去女適彼樂土言去亂邦就有道可也審配二子為操所

禽紹將孟岱言於紹曰配在位專政族大兵彊且二子在南必懷反計郭圖辛評亦以為然紹遂以岱為監軍代配守鄴護軍逢紀素與配不睦紹以問之紀曰配天性烈直每慕古人之節必不以二子在南為不義也願公勿疑紹曰君不惡之邪紀曰先所爭者私情也今所陳者國事也紹曰善乃不廢配配由是更與紀親厚冀州城邑叛紹者紹稍復擊定之紹為人寬雅有局度喜

怒不形於色而性矜愼自高短於從善故至於敗六年
曹操以紹新敗欲乘其困遂定之夏四月揚兵河上擊
紹倉亭軍破之紹軍不出操乃還七年春操復進軍官
渡紹自軍敗憤發病嘔血夏五月卒紹政寬百姓德之
河北士女莫不悼念市巷揮涕如喪所親紹後妻劉性
酷妬紹死未殯盡殺紹寵妾五人曰死者有知當復被
寵地下乃髡頭黑面殘毀其形又盡滅其家紹三子譚
宇顯思熙宇顯雍尚宇顯甫譚長而惠尚少而美劉氏

有寵而愛尚數稱於紹紹亦奇其姿容欲以為嗣而未顯言之乃以譚繼兄後出為青州刺史沮授諫曰世稱萬人逐兔一人獲之貪者悉止分定故也

原注慎子兔走於街百人

逐之貪人俱存人莫之非者以兔為未分定故也積兔滿市過不能顧非不欲兔也分定之後雖鄙不爭

且

年鈞以賢德鈞則卜古之制也願上惟先代成敗之誠下思逐兔分定之義紹曰吾欲令四兒各據一州以觀其能授出曰禍其始此乎於是以中子熙為幽州刺史外甥高幹為并州刺史譚至青州其土自河而西不過

平原譚北排田指東破孔融曜兵海隅威惠甚著流民
多歸之寢以富彊其後信用羣小驕奢淫佚華彥孔順
姦佞猾險委以腹心別駕王修忠良正直備員而已使
婦弟領兵內草竊市井外剽掠田野又使兩將募兵屬
縣有賂者免白籍貧民竄伏丘墓放兵捕索如獵鳥獸
於是聲望大損境土蕭條復如始至之日矣及紹卒嗣
猶未定逢紀審配以驕縱為譚所惡辛評郭圖皆比於
譚而與紀配有隙衆以譚長欲立之配等恐譚立而評

欽定四庫全書

補後漢書
卷九

三

等為害遂與劉氏謀矯紹遺命奉尚為嗣譚至不得立
自稱車騎將軍出屯黎陽尚少與之兵而使逢紀隨之
譚求益兵審配等又議不與譚怒殺逢紀八年春曹操
渡河攻譚譚告急於尚尚乃留審配等守鄴自將助譚
與操相拒於黎陽自九月至明年二月

謹案後漢書與此合陳志作自

二月至九月

大戰城下譚尚敗夜遯還鄴操追至鄴收其麥

尚逆擊破操操軍還許譚謂尚曰我鎧甲不精故前為
曹操所敗今操軍退人懷歸志及其未濟出兵掩之可

令大潰此幾不可失也尚疑而不許既不益兵又不易
甲譚大怒郭圖辛評因謂譚曰使先公出將軍為兄後
者皆審配之謀也譚遂引兵攻尚戰於外門譚敗乃引
兵還南皮王修率吏人自青州往救譚譚還欲更攻尚
修曰兄弟者左右手也譬人將鬪而斷其右手曰我必
勝其可乎夫棄兄弟而不親天下其誰親之屬有讒人
交鬪其間以求一朝之利願塞耳勿聽也若斬佞臣數
人復相親睦以御四方可橫行天下譚不從譚將劉詢

起兵漂陰以叛譚諸城皆應譚歎曰今舉州皆叛豈孤之不德邪修曰東萊太守管統雖在海表此人不反後十餘日統果棄其妻子赴譚妻子為賊所殺譚更以統為樂安太守尚復自攻譚譚戰大敗嬰城固守尚圍之急譚奔平原尚軍館陶譚復出擊尚尚敗走險譚追擊之尚設伏出奇復大破譚僵尸十餘里譚復走保平原尚復攻之戰於外門譚軍復敗郭圖說譚曰今將軍國小兵少糧匱勢弱顯甫之來外則不敵愚以為可呼曹

操使擊顯甫操至必先攻鄴顯甫還救將軍引兵而西
自鄴以北盡可獲也若顯甫破敗其兵散亡又可斂取
以拒操操遠來糧餉不繼必自逃去則趙國以北皆我
之有亦足與操為對矣譚始不納後遂從之問誰可使
圖曰辛佐治可譚遂遣毗詣操請救時操南擊劉表次
于西平毗見操致譚意且陳取尚平河朔策以自結於
操操大悅乃許譚平劉表遺譚書曰天降災害禍難殷
流初交殊族卒成同盟使王室震蕩彝倫攸斁是以智

達之士莫不痛心入骨傷時人不能相忍也然孤與太
公志同願等雖楚魏絕邈山河迥遠戮力乃心共獎王
室使非族不干吾盟異類不絕吾好此孤與太公無貳
之所致也功績未卒太公殂殞賢脩承統以繼洪業宣
奕世之德履丕顯之祚摧嚴敵於鄴都揚休烈於朔土
顧定疆宇虎視河外凡我同盟莫不景附何悟青蠅飛
於竿旌無忌游於二壘

原注無忌楚
讒人費無忌

使股肱分成二體

胸膂絕為異身初聞此問尚謂不然定聞信來乃知關伯

實沈之忿已成

原注左氏傳高辛氏有二子伯曰閼伯季曰實沈居於曠林不相能也日尋干

步以相

棄親即讎之計已決旃旆交於中原暴尸累於

征討

城下聞之哽咽若存若亡昔三王五伯下及戰國君臣相弑父子相殺兄弟相殘親戚相滅蓋時有之然或欲以成王業或欲以定霸功皆所謂逆取順守而徼富彊於一世也未有棄親即異兀其根本而能全於長世者昔齊襄公報九世之讐士勾卒荀偃之事是故春秋美其義君子稱其信夫伯游之恨於齊未若太公之忿於

曹也宣子之承業未若仁君之繼統也

原注公羊傳紀侯大去其國大

去者何滅也孰滅之曷為不言齊滅之為襄公諱也春秋為賢者諱何賢乎襄公復讐也何讐爾遠祖也哀公

亨乎周紀侯諧之遠祖者幾世乎九世矣九世猶可以復讐乎雖百世可也左氏傳荀偃將中軍士匄佐之

伐齊濟河病目出及卒而視不可含士匄撫之曰主苟終所不嗣事於齊者有如河乃瞑受含荀偃字伯游宣

子即士匄也

且君子違難不適讐國交絕不出惡聲況忘先

人之讎棄親戚之好而為萬世之戒遺同盟之恥哉蠻

夷戎狄將有誚讓之言況我族類而不痛心邪夫欲立

竹帛於當時全宗祀於一世豈宜同生分謗爭校得失

乎若冀州有不弟之傲無慚順之節仁君當降志辱身
以濟事為務事定之後使天下平其曲直不亦為高義
邪今仁君見憎於夫人未若鄭莊之於姜氏昆弟之嫌
未若重華之於象教然莊公卒崇大隧之樂象教終受
有鼻之封損棄百病追攝舊義復為母子昆弟如初

原注

左氏傳鄭武姜生莊公及共叔段愛段請京使居之段
將襲鄭夫人將啟之莊公伐段段出奔共遂寘姜氏于
城潁而誓之曰不及黃泉無相見也既而悔之潁考叔
曰若掘地及泉隧而相見其誰曰不然從之公入而賦
大隧之中其樂也融融姜出而賦大隧之外其樂也洩
洩遂為母子如初

史記

薛母死替嫂更娶妻生象象

續後漢書

三十七

帝欲殺舜舜踐帝位
封象有庫為諸侯

今整勒士馬瞻望鵠立又與尚書

曰知變起辛卯禍結同生追闕伯實沈之蹤忘常棣死
喪之義親尋干戈僵尸流血聞之哽咽若存若亡昔軒

轅有涿鹿之戰周公有商奄之師

原注史記蚩尤作亂
黃帝乃徵師諸侯與

蚩尤戰于涿鹿之野擒殺蚩尤周
公東伐淮夷踐奄遷其君蒲姑

皆所以翦除穢害而

定王業非強弱之爭喜怒之忿也故雖滅親不尤誅兄
不傷今二君初承洪業纂繼前轍進有國家傾危之慮
退有先公遺恨之負當惟義是務惟國是康何者金木

水火剛柔相濟然後克得其所能為人用今青州天性
峭急速於曲直仁君度數弘廣綽然有餘當以大包小
以優容劣先除曹操以平先公之恨事定之後乃議曲
直之評不亦善乎若留神遠圖克已復禮當振旅長驅
共獎王室若迷而不反遵而不改則胡夷將有誚讓之
言況我同盟復能戮力仁君之役哉此韓盧東郭自困

於前而遺田父之獲者也

原注戰國策齊欲伐魏淳于
髡謂齊王曰韓子盧者天下

之疾犬也東郭逵者海內之狡兔也韓子盧逐東郭逵
環山者三騰山者五兔極於前犬發於後犬兔俱廢各

死其所田父見之無勞勸之苦而擅其功今齊魏久相持以頓其兵弊其衆臣恐彊秦大楚承其後有田父之功齊王謝將休士也

憤躍鶴望冀聞和同之聲若其秦也則袁族其與漢升降乎如其否也則同盟永無望矣譚尚並不從曹操遂還救譚十月至黎陽尚聞操渡河乃釋平原還鄴尚將呂曠高翔叛歸曹操譚復陰刻將軍印以假曠翔操知譚詐乃為子整聘譚女以安之而引軍還九年三月尚使審配蘇由守鄴復攻譚於平原配獻書於譚曰配聞良藥苦口利於病忠言逆耳便於行願將軍

緩心抑怒終省愚辭蓋春秋之義國君死社稷忠臣死

君命苟圖危宗廟剝亂國家親踈一也是以周公垂涕

以蔽管蔡之獄季友獻欵而行叔牙之誅

原注左氏傳公疾問後於

叔牙對曰慶父材問於季友對曰臣以死奉般公曰鄉者牙曰慶父材成季使以君命命傅叔待于鍼巫氏使鍼季醕之曰飲此則有後於魯國不飲死且無後飲之歸及達泉而卒何則義重人輕事

不獲已故也昔衛靈公廢蒯瞶而立輒蒯瞶為不道入

戚以篡衛師伐之春秋傳曰以石曼姑之義為可以拒

之是以蒯瞶終獲叛逆之罪而曼姑永享忠臣之名

原注

公羊傳晉趙鞅帥師納衛世子蒯聵于戚戚者何衛之邑也曷為不言入于衛父有子子不得有父也齊國夏衛石曼姑帥師圍戚齊國夏曷為與衛石曼姑圍戚伯討也此其為伯討奈何曼姑受命乎靈公而立輒以曼姑之義為固可以拒之也輒者何蒯聵之子也然則曷為不立蒯聵而立輒靈公逐蒯聵而立輒則輒之義可也

以立也

父子猶然況兄弟乎昔先公廢紂將軍以續賢兄

立我將軍以為適嗣上告祖靈下書譜牒先公謂將軍為兄子將軍謂先公為叔父海內遠近誰不備聞且先公即世之日我將軍斬衰居廬而將軍齋于堊室出入之分於斯益明時凶臣逢紀妄畫蛇足

原注戰國策楚有祠者賜其舍

人卮酒舍人相謂曰數人飲之不足一人飲之有餘請
畫地為蛇先成者飲酒一人蛇先成引酒且飲之乃左
手持卮右手畫蛇曰吾能為之足未成一人之蛇成奪
其卮曰蛇固無足子安能為之足遂飲其酒為蛇足者
終亡其酒

曲辭諂媚交亂懿親我將軍奮赫然之怒誅不旋
踵將軍亦奉命承旨加以淫刑自是之後癰疽破潰骨
肉無絲髮之嫌自疑之臣皆保生全之福故悉遣彊胡
簡命名將料整器械選擇戰士殫府庫之財竭食土之
實其所以供奉將軍何求而不備君臣相率共衛旌麾
戰為鴈行賦為歸主雖傾倉覆庫翦剝民物上下欣戴

莫敢告勞何則推戀戀忠赤之情盡家家肝腦之計唇

齒輔車不相為傷

原注左氏傳宮之奇曰輔車相依唇亡齒寒其虞虢之謂乎

謂為

將軍心合意同混齊一體必當并威偶勢禦寇寧家何

圖凶險讒慝造飾無端誘導姦利至今將軍翻然改圖

忘孝友之仁聽豺狼之謀襲閼沈之迹誣先公廢立之

言違近者在喪之位悖紀綱之理不顧逆順之節橫易

冀州之主欲當先公之繼遂放兵鈔突屠城殺吏交屍

盈原裸民滿野至於髡髮膚割截支體冤魂痛於幽

冥創痍被於草棘又乃圖獲鄴城許賜秦胡財物婦女
豫有分數又告令吏士云孤雖有老母輒使身體完具
而已聞此言者莫不驚愕失氣悼心揮涕使太夫人憂
哀憤懣我州君臣士友假寐悲歎念欲靜師拱默以聽
執事之圖則懼違春秋死命之節詒太夫人不測之患
隕先公萬世之業且三軍憤慨人懷私怒我將軍辭不
獲命以及館陶之役是時外為禦侮內實乞罪既不見
赦而加屠辱各二三其心臨陳叛戾我將軍進退無功

首尾受敵引軍奔避不敢告辭亦謂將軍少垂親親之仁貺以緩追之惠

原注較梁傳緩追
遠賊親親之道也

而乃尋蹤躡軌無

所逃命困獸必鬪以干嚴刑而將軍師旅土崩瓦解此非人力乃天意也是後又望將軍克己復禮追還孔懷如初之愛而縱情重怒散鋒放火播增毒螫烽煙相望涉血千里遺城厄民引領悲怨雖欲勿救惡得已哉故遂引軍東轅保正疆場雖近郊壘未侵境域然望旌麾能不永歎配等備先公家臣奉廢立之命而圖等干國

亂家禮有常刑故奮敝州之賦以除將軍之疾伏惟將
軍至孝蒸蒸發於岐嶷友于之性生於自然章之以聰
明行之以敏達覽古今之舉措觀興敗之徵符輕榮財
於糞土貴名高於丘嶽何意奄然迷沈墮賢哲之操積
怨肆忿取破家之禍翹企延頸待望讐讐敵委慈親於虎
狼之牙以逞一朝之志豈不痛哉若乃天啓尊心草圖
易慮則我將軍匍匐悲號於將軍掌股之上配等亦當
敷躬布體以聽斧鑕之刑若必不悛有以國斃圖頭不

縣軍不反旆願將軍詳度事宜錫以環玦

原注荀子絕人以玦反人

以環譚得書登城而泣既刼於郭圖又以兵鋒累交遂不

納曹操進攻鄴到洹水去鄴五十里蘇由為內應謀泄

與配戰城中敗出奔操操遂為土山地道攻之配亦於

內作塹以當之配將馮札

謹案馮札與後漢書合陳志作馮禮

為內應開

突門內操兵三百餘人

原注墨子構突篇城百步一突門突門用車兩輪以木束之塗

其上雄置突門內度門廣狹之令人入門四尺中置室突門旁為索充竈狀又置艾寇即入下輪而塞之故索

薰之也

配覺之從城上以大石擊門門閉入者皆死操乃鑿

塹圍城周四十里初令淺示若可越配望而笑之不出
爭利操一夜濬之廣深二丈引漳水以灌之自五月至
八月城中餓死者過半尚聞鄴急將軍萬餘人還鄴未
到欲令審配知外動止先使主簿鉅鹿李孚入城孚所
問事杖繫馬邊自著平上幘將三騎投幕詣鄴下自稱都
督歷北圍循表而東步步呵責守圍將士隨輕重行其
罰遂歷操營前至南圍當章門復責怒守圍者收縛之
因開其圍馳到城下呼城上人城上人以繩引孚得入

配等見孚悲喜鼓譟稱萬歲守圍者以狀聞操笑曰此
非徒得入也方且復出孚知外圍益急不可復冒乃請
配悉出城中老弱以省穀夜簡別數千人皆使持白幡
從三門並出降孚復將三騎作降人服隨輩夜出突圍
得去尚乃依西山來東至陽平亭去鄴十七里臨滏水
舉火以示城中城中亦舉火應之配出兵城北欲與尚
對決圍操逆擊之敗還尚亦破走依曲漳為營操復圍
之未合尚懼遣陰夔陳琳求降不聽尚還走藍口

謹案
藍口

與後漢書合
陳志作溫口

操復進急圍之尚將馮延等臨陣降衆大潰尚奔山中盡收其輜重得尚印綬節鉞及衣物以示城中城中崩沮審配令士卒曰堅守死戰操軍疲矣幽州方至何憂無主操出行圍配伏弩射之幾中配兄子榮為東門校尉榮夜開門內操兵初譚之去辛毗郭圖家得出而辛評家獨被收及操兵入配在城東南角樓見之知城必陷忿辛郭破壞冀州遣人馳詣鄴獄指殺評家配乃拒戰城中操兵生縛配詣帳中叱聞配屠評

家逆以馬鞭擊配頭罵之曰奴汝今日真死矣配顧曰
狗輩正由汝曹破我冀州恨不得殺汝且汝今日能生
殺我邪有頃操引見謂配曰知誰開卿城門配曰不知

也操曰自卿子榮爾

謹案志注作自卿
文榮耳文字訛

配曰小兒不足

用乃至此操復謂曰曩者孤行圍何弩之多也配曰恨
其少爾操曰卿忠於袁氏父子亦自不得不爾也有意
欲活之配意壯烈終無撓辭而辛毗等號哭不已乃殺

之

原注樂資山陽公載記及袁曄獻帝春秋並云太祖
兵入城審配戰於門中既收逃于井中殺之裴松之

曰配一代烈士袁氏之死臣宜當數窮之日方逃身于并此之難信誠為易了不知資暉之徒竟為何人未能識別然而輕弄翰墨妄生異端以行其書如此之類正足以誣罔視聽疑誤後生矣寔史籍之罪人達學之所不取者也

初冀州張子謙先降素與配不合笑謂配曰正南卿竟何如我配厲聲曰汝為降虜審配為忠臣雖死豈羨汝生邪臨行刑叱持兵者令北向曰我君在北也見者莫不歎息操以尚在乃全尚母妻子還其財寶操子丕見熙妻甄氏美即納之高幹以并州降復為刺史操之圍鄴也譚復背之因略取甘陵安平渤海河間攻尚於

中山尚敗走故安從熙而譚悉收其衆還屯龍湊十二
月操討譚軍其門譚夜遁奔南皮臨清河而屯明年正
月急攻之譚欲出戰軍未合而敗譚被驅馳追者意非
恒人趨奔之譚墮馬顧曰咄兒過我我能富貴汝言未
絕口頭已斷地李孚自稱冀州主簿求見操曰今城中
強弱相陵人心擾亂以為宜令新降為內所識信者宣
傳明教操即使孚往入城告諭吏民使各安故業不得
侵凌城中乃安操於是斬郭圖等及其妻子袁譚使王

修運糧於樂安聞譚急將所領兵往赴之至高密聞譚死下馬號哭曰無君焉歸遂詣曹操乞收葬譚屍操欲觀修意默然不應修復曰受袁氏厚恩若得斂譚屍然後就戮無所恨操乃許之

原注傳子曰太祖既誅袁譚梟其首令曰敢哭者殺及妻子於是

王叔治田子泰相謂曰生受辟命亡而不哭非義也畏死忘義何以立世遂造其首而哭之哀動三軍軍正白行其戮太祖曰義士也赦之裴松之曰田疇傳云疇為表尚所辟不受譚命傳子合而言之有違事實以

修為督軍糧還樂安譚所部諸城皆服惟樂安太守管統不下操命修取統首修以統亡國忠臣解其縛使詣操操悅

而赦之袁氏政寬在職勢者多畜聚操破鄴籍沒審配等家財物百萬數及破南皮閱修家穀不滿十斛有書數百卷操歎曰士不妄有名辟修司空掾熙尚為其將焦觸張南所攻奔遼西烏桓觸自號幽州刺史驅率諸郡太守令長背袁向曹陳兵數萬殺白馬盟令曰違者斬衆莫敢仰視各以次軟至別駕代郡韓珩曰吾受袁公父子厚恩今其破亡智不能救勇不能死於義闕矣若乃北面曹氏所不能為也一坐為珩失色

原注先賢
行狀珩字

子侃代郡人清粹有雅量少觸曰夫舉大事當大義事
喪父母奉養兄姊宗族稱弟

之濟否不待一人可卒珩志以厲事君操聞珩節甚高
之屢辟不至卒於家高幹聞操討烏桓復以并州叛執
上黨太守舉兵守壺口關操遣樂進李典擊之幹還守
壺關城十一年春正月操自將擊幹幹聞之留別將守
城走匈奴求救于單于單于不受操圍壺關三月拔之

幹遂走荊州上雒都尉王琰捕斬之

原注典論上雒都尉王琰獲高幹以

功封侯其妻哭於室以為琰富貴將更娶妾賤而奪已愛故也

十二年曹操征遼西擊

烏桓尚熙與烏桓逆操軍戰敗走乃與親兵數千人奔
公孫康於遼東尚有勇力先與熙謀曰今到遼東康必
見我我獨為兄手擊之且據其郡猶可以自廣也康亦
心規取尚以為功乃先置精勇於廐中然後請尚熙疑
不欲進尚強之遂與俱入未及坐康叱伏兵禽之坐於
凍地尚謂康曰未死之間寒不可忍可相與席康曰

議

陳志作熙曰誤考後漢書作康曰與此合

卿頭顱方行萬里何席之為遂斬

首送操

原注吳書尚有弟名買與尚俱走遼東曹瞞傳云買尚兄子未詳

紹從兄遺字

伯業為長安令河間張超薦於太尉朱儁稱遺有冠世之才幹時之略具忠允亮直固天所縱若乃包羅載籍管綜百氏登高能賦覩物知名求之今日邈焉靡儔儔遂辟遺累遷山陽太守舉兵討卓後失官紹乃用為揚州刺史袁術攻之敗死曹操稱長大而能勤學者惟吾

與袁伯業爾

原注范曄論曰袁紹初以豪俠得衆遂懷雄霸之圖天下勝兵舉旗者莫不假以為

名及臨場決敵則悍夫爭命深籌高議則智士傾心盛哉乎其所資也韓非曰狼剛而不和復過而好勝嫡子輕而庶子衆斯之謂亡敎

袁術上

袁術字公路司空逢之子紹之從弟也少以俠氣聞數與諸公子飛鷹走狗後頗折節舉孝廉歷職內外累遷河南尹虎賁中郎將靈帝崩與紹共誅宦官董卓欲廢立以術為後將軍術畏卓出奔南陽會長沙太守孫堅殺南陽太守張咨引兵從術劉表上術為南陽太守

原注

案獻帝初平元年袁術據南陽後漢書術傳云劉表上術為南陽太守表傳云術阻兵屯魯陽表不得至荊州陳志術傳孫堅殺張咨術得據南陽魏武帝紀此年三月已云術屯南陽蓋術初奔魯陽此春孫堅取南陽術

乃據之猶以魯陽為治所也

關東諸將議以靈帝失道使天下叛亂

少帝幼弱為賊臣所立又不識母氏所出幽州牧劉虞宿有德望欲立為主紹與冀州牧韓馥使人報術術觀漢室衰陵陰懷異志故外託公義以拒紹紹復與術書曰前與韓文節共建永世之道欲海內見再興之主今西名有幼君無血脈之屬公卿以下皆媚事卓安可復

信但當使兵往屯關要皆自蹙死於西東立聖君太平

可冀如何有疑又室家見戮不念子胥可復北面乎

原注

史記伍子胥名員父曰伍奢凡曰伍尚費無忌諫太子
建于楚平王殺之奢為太傅并殺奢及尚員遂奔吳事
吳王闔廬導之伐楚入郢都
楚平王墓出其屍鞭之三百
違天不祥願詳思之術答

曰聖主聰叡有周成之質賊卓因危亂之際威服百寮
此乃漢家小厄之會亂尚未厭復欲興之乃云今主無
血脈之屬豈不誣乎先人以來奕世相承忠義為先太
傅公仁慈惻隱雖知賊卓必為禍害以信徇義不忍去
也門戶滅絕死亡流漫幸蒙遠近來相赴助不因此時
上討國賊下刷家恥而圖為此非所敢聞又曰室家見

戮可復北面此卓所為豈國家哉君命天也天不可讐
況非君命乎悽悽赤心志在滅卓不識其他會虞拒不
從議遂寢術表孫堅行破虜將軍領豫州刺史使率荆
豫之卒擊破董卓於陽人表紹因堅討卓未反遣其將
會稽周昕奪堅豫州術怒擊昕走之釁隙遂成術之得
南陽戶口數百萬而術奢淫肆欲徵斂無度百姓苦之
稍稍離散既與紹有隙又與劉表不平乃各外交黨援
以相圖術結公孫瓚而紹連劉表豪傑多附於紹術怒

曰羣豎不從吾而從吾家奴乎又與公孫瓚書云紹非
袁氏子紹聞大怒初平三年術遣孫堅擊劉表於襄陽
堅戰死公孫瓚使昭烈合謀共逼紹紹與曹操會擊皆
破之四年術為劉表所逼引軍入陳留屯封丘黑山餘
賊及匈奴於扶羅等佐術與曹操戰於匡亭大敗退保
雍丘又走襄邑操追擊連破之乃將其餘衆奔九江初
揚州刺史陳溫卒紹遣袁遺領州術攻遺敗走沛國為
亂兵所殺術用下邳陳邠為之術敗欲赴壽春瑀拒不納

術退保陰陵收兵攻瑤瑤敗走歸下邳

原注案陳志術以餘衆奔九江

殺揚州刺史陳溫領其州英雄記謂溫卒遺敗而瑤為之記說為詳故取之

術自領州兼稱

徐州伯以張勲橋蕤為將軍李傕入長安欲結術為援乃授術左將軍假節封陽翟侯遣太傅馬日磾因循行拜授術奪日磾節拘留不遣日磾憂

恚嘔血死術見識書言代漢者當塗高自云名字

應之

原注當塗高魏也術自以術及路皆塗也故自云應其識

又以袁氏出陳為舜

後以黃代赤德運之次

原注袁濤塗陳公族大夫袁氏其後也火生土故云以黃代赤

遂有僭逆之謀又聞孫堅得傳國璽遂拘堅妻奪之

原注

吳書堅入洛掃除漢宗廟祠以太牢堅軍城南甄官井
上旦有五色氣舉軍驚怪莫有敢汲堅令人入井探得
漢傳國璽文曰受命于天既壽永昌方圓四寸上紐交
五龍上一角缺初黃門張讓等作亂劫天子出奔左右
分散掌璽者以投井中江表傳案漢獻帝起居注云
天子從河上還得六璽於閭上又太康之初孫皓送金
璽六枚無有玉明其偽也裴松之曰傳國璽者乃漢
高祖所佩秦皇帝璽世世傳受號曰傳國璽案傳國不
在六璽之數安得總其說乎應氏漢官里甫世紀其論
六璽文義皆符漢官傳國璽文曰受命于天既壽且康
永昌二字為錯未知兩家何者為得金玉之精率有光
氣加以神器祕寶輝耀益彰蓋一代之奇觀將來之異
聞而以此不解之故彊謂之偽不亦誣乎陳壽為破虜傳
亦除此說俱惑起居注不知六璽殊名與傳國為七者

也吳時無能刻玉故天子以金為璽璽雖以金於丈不
異吳降而送璽者送天子六璽囊所得玉璽乃古人遺
印不可施用天子之璽今以無有為難不通其義者爾
又曰孫堅於興義之中最有忠烈之稱若得漢神龍而
潛匿不言此陰懷異志豈所謂忠臣者乎吳使欲以為
國華而不知損堅之令德如其果然以傳子孫縱非六
璽之數要非常人所畜孫皓之降亦不得但送六璽而
寶藏傳國也受命于天吳取於歸命之堂若如壽言則
此璽今尚在孫門匹夫懷璧猶曰有罪而況斯物哉

興平二年冬天子播越敗於
曹陽術大會羣下因謂曰今海內鼎沸劉氏微弱吾家
四世公輔百姓所歸欲應天順民於諸君何如衆莫敢
對主簿閻象進曰昔周自后稷至于文王積德累功三

分天下猶服事殷明公雖奕世克昌孰若有周之盛漢
室衰微未至殷紂之弊術默然使召張範範辭遣弟承
往應之術問曰昔周室陵遲則有桓文之霸秦失其政
漢接而用之今孤以土地之廣士人之衆欲徼福於齊
桓擬迹於高祖可乎承對曰在德不在衆苟能用德以
同天下之欲雖云匹夫霸王可也若陵僭無度干時而
動衆之所棄誰能興之術不悅自孫堅死子策復領其
部曲術遣擊揚州刺史劉繇破之策因據江東聞術欲

僭號與書諫曰蓋上天垂司過之星

原注天官書虛次有司非二星主司過失

聖王建敢諫之鼓

原注鄧析子堯置敢諫之鼓舜立誹謗之木

設非謬之備

急箴闕之言何哉凡有所長必有所短也去冬傳有大

計無不悚懼旋知供備貢獻萬夫解惑頃聞建議復欲

追遵前圖即事之期便有定月益使愜然想是流妄設

其必爾民何望乎曩者董卓無道輒擅廢立陵虐王室

敢行弑逆禍加太后暴及弘農略烝宮人發掘陵寢焚

毀宗廟殘賊忠良劫遷乘輿天子播越是以豪傑發憤

沛然俱起神武外振元惡內斃幼主東顧乃俾保傅奉
宣明命使各罷兵修文偃武與之更始而河北通謀黑
山曹操放毒東徐劉表稱亂南荆公孫魚休朔北正禮
阻兵江許玄德爭盟淮壖是以未獲承命橐弓戢戈當
謂使君與國同規乃舍是弗恤完然有自取之志豈海
內所望之意哉昔成湯伐桀稱有夏多罪武王伐紂曰
殷有重罰此二王者雖有聖德宜當君世使時無失道
亦無由逼取之也今幼主非有惡於天下徒以春秋尚

少脅於彊臣而欲奪之懼非湯武之舉也卓雖狂狡猶不敢廢主自立以中土希戰之兵當邊地勁悍之虜是以斯須游魂尋已斃滅今四方之人皆便戰鬪各據方州地廣兵彊乃欲為卓所不為以逆臨之是取禍也且天下神器不可虛干殷湯有白鳩之祥周武有赤鳥之瑞漢高有星聚之符世祖有神光之徵

原注漢書元年冬十月五星聚

於東井沛公至霸上後漢書南頓君生光武於縣舍有赤光照室中

皆因民之困瘁於

桀紂之政毒苦於秦莽之役故能芟去無道致成其志

今天下非患於幼主尊明無受命之德一旦登即尊位
祇聚天下之兵爾天子之貴四海之富夫誰不欲義不
可也是以陳勝項籍王莽公孫述之徒皆南面稱孤莫
之能濟可以為監又聞幼主明智聰敏有夙成之德天
下咸歸心焉若除其偏輔而相之必成中興之業致成
周之盛則旦奭之美率土所望縱使幼主有他改異猶
望推宗室之譜屬論近親之賢良以紹漢統而固劉宗
比跡周霍書功金石圖形丹青流慶罔極使君五世相

承

原注安生京生湯生逢生樹凡五世

為漢台輔榮寵之盛莫與為

比宜效忠守節扶國家之躋頓念社稷之危阢以奉祖
考之志報漢室之恩夫忽履道之節而彊進取之欲者
曲感圖緯之言妄牽非類之文苟以悅主為美不顧成
敗之計謂天下之人非家吏則門生也孰不從我四方
之敵非吾匹則吾役也誰能違我盍乘累世之勢起而
取之哉為難圖之事抗難保之勢以徼羣敵之氣生衆
人之心反忠為逆累世之公族一舉而喪之後雖有悔

恐無及矣忠言逆耳幸留神聽術不納策遂絕之

袁術下

建安二年因河內張炯符命遂僭號自稱仲家

謹案仲家與後

漢書合魏志作仲氏

以九江太守為淮南尹置公卿百官郊祀天

地沛相陳珪故太尉球弟也術與珪俱公族子孫少其
交游書與珪曰昔秦失其政天下羣雄爭而取之兼智
勇者卒受其歸今世事紛擾復有瓦解之勢矣誠英又
有為之時也與足下舊交豈肯左右之乎若集大事子

實為吾心膂珪中子應時在下邳術並脅質應圖必致
珪珪答書曰昔秦末世肆暴恣情虐流天下毒被生民
下不堪命故遂土崩今雖季世未有亡秦苛暴之亂也
曹將軍神武應期興復典刑將撥平凶慝清定海內信
有徵矣以為足下當戮力同心匡翼漢室而陰謀不軌
以身試禍豈不痛哉若迷而知反尚可以免吾備舊知
故陳至情雖逆於耳骨肉之惠也欲吾營私阿附有死
不能術欲以故兖州刺史金尚為太尉尚不許而逃術

追殺之乃遣使者韓脣以稱帝事告呂布并為其子聘布女布執脣送許術大怒遣其將張勲橋蕤攻布大敗而還術又率兵擊陳國誘殺其王寵及相駱俊曹操乃自征之術聞大駭即走渡淮留張勲橋蕤於蘄以拒操操擊破之斬勲退走術兵弱將死衆情離叛加天旱歲荒士民凍餒江淮間相食殆盡時舒仲應為術沛相術以米十萬斛與為軍糧仲應悉散以給飢民術聞怒陳兵將斬之仲應曰知當必死故為之爾寧以一人之

命救百姓於塗炭術下馬牽之曰仲應足下獨欲享天下重名不與吾共之邪術雖矜名尚奇而天性驕肆尊己陵物及竊偽號淫侈滋甚媵御數百無不兼羅紈厭

梁肉

原注九州春秋司隸馮方女國色也避亂揚州術登城見而悅之遂納焉甚愛幸諸婦害其寵語之

曰將軍貴人有志節當時時涕泣憂愁必長見敬重馮氏以為然後見術輒垂涕果以有心志益哀之諸婦人因其殺殺聽之則梁術誠以自下飢困莫之簡卹於是為不得志而死乃厚加殯殮

資實空盡不能自立四年夏乃燒宮室奔其部曲陳簡

謹案陳簡與後漢書合陳志作陳蘭

雷薄於瀟山復為簡等所拒遂大困

窮士卒散走憂懣不知所為遂歸帝號於紹曰祿去漢
室久矣天下提挈政在家門豪雄角逐分割彊宇此與
周末七國無異惟彊者兼之爾袁氏受命當王符瑞炳
然今君擁有四州人戶百萬以彊則莫與爭大以位則
無所比高曹操雖欲扶衰獎微安能續絕運起已滅乎
謹歸大命君其興之紹陰然其計術因欲北至青州從
袁譚曹操使昭烈徼之不得過復走還壽春六月至江
亭去壽春八十里問糧儲祇有麥屑三十斛盛夏求蜜

漿不獲坐簀牀良久乃大咤曰袁術乃至是乎頓伏牀
下嘔血斗餘死術從弟胤畏曹操不敢入壽春奉術柩
及妻子依故吏廬江太守劉勲孫策破勲復見收視術
女入孫權宮子曜仕吳為郎中

原注陳志董卓術劉
表共一傳評曰董卓很

庚賊忍暴虐不仁自書契已來殆未之有也袁術奢淫
放肆榮不終已自取之也袁紹劉表咸有威容宛觀知
名當世表跨蹈漢南紹鷹揚河朔然皆外寬內忌好謀
無決有才而不能用聞善而不能納廢嫡立庶舍禮崇
愛至于後嗣顛覆社稷傾覆非不幸也昔項羽背范增
之謀以喪其王業紹之殺田豐乃甚於羽遠矣裴松之
曰蔡紂無道秦莽縱虐皆多歷年所然後衆惡乃著董
卓自竊權柄至于殞斃計其日月未盈三周而禍崇山

岳毒流四海其殘忍之性實豺狼不若書拜未有斯言
為當但評既曰賊忍又云不仁賊忍不仁於辭為重袁
術無豪芒之功纖芥之苦而猖狂于時妄自尊立國義
夫之所扼腕人神之所同疾雖復恭儉節用而猶必覆
亡不暇而評但云奢淫
不終未足見其大惡

議曰袁氏奕世公鼎高風義軌冠冕海內紹資望夙著
一旦提劍而起汎除閹豎肅清宮闈心不義卓投袂而
起則有英雄之志矣於是山東討賊推為盟主河朔服
義讓以方州卒連幽并青冀橫制天下之半材勇效命
智謀貢策翼戴天子而加之以共則桓文之舉也乃猜

忌自用潛懷不軌稽失事機為操所先忽兵犯順折衄
以死幼長倒置禍起骨肉家聲委地咸其自取也術恃
冢中枯骨敢奸大分罪浮于紹矣沮授田豐計畫不用
而不能去卒蹈其難其猶在亞父之後乎

原注史記項羽疑范增稍

奪其權范增怒曰天下事大定矣君王自為之顧賜骸骨歸行未至彭城疽發背死審配慷慨壯

烈死於袁氏豈君子之澤猶未斬也劉表譬解譚尚深

明嫡庶長幼之分而身感於琮琦可謂九江之龜靈於

人而不靈於己者也

原注書九江納錫大龜莊子仲尼曰神龜能見夢於元君而不能

避余且之網知能七十二鑽而無遺策不能避
剗腸之患如是則智有所困神有所不及也

贊曰二昆挺挺志清王路譽勇嗇禍闕覬僭據得雉失
盧夫豈操敵隕身赤宗諸子狼籍豐授智計豈劣攸詡
事非其人貽誚千古